

萬 有 文 庫

第 二 集 七 百 種

王 雲 五 主 編

昭 德 先 生 郡 齋 讀 書 志

( 二 )

吳 公 武 撰

商 務 印 書 館 發 行





昭德先生郡齋讀書志

(二)

晁公武撰

國學基本叢書

昭德先生郡齋讀書志卷第三下

小說類

太平廣記五百卷

右皇朝太平興國初詔李昉等取古今小說編纂成書同太平總類太平御覽上之

補妬記一卷

右古有妬記久已亡之不知何人輯傳記中婦人嚴妬事以補亡自商周至于唐初

吉凶影響十卷

右皇朝岑象求編熙寧末閑居江陵散閱載籍見善



惡報應事輒刪潤而記之間有聞見者難於備載亦  
采摘著十篇

文房四譜五卷

右皇朝蘇易簡撰集古今筆硯紙墨本原及其故實  
繼以賦頌述作有徐鉉序

紺珠集十二卷

右皇朝朱勝非編百家小說以此書序說張燕公有  
紺珠見之則能記事不忘故以爲名

類記六十卷

右皇朝曾慥編其序云閑居銀峯因集百家之說纂

成書可以資治體助名教供笑談廣聞見

二百家類事六十卷

右分門編古今稗官小說成一書雖曰該博但失於太略耳不題人姓氏

世說新語十卷

右宋劉義慶撰劉孝標注紀東漢以後事分三十八門唐藝文志云劉義慶世說八卷劉孝標續十卷而崇文摠目止載十卷當是孝標續義慶元本八卷通成十卷耳一本極詳一本殊略未知孰爲正然其目則同劉知幾頗言非其實錄



博物志十卷

右晉張華茂先撰周日用注載歷代四方奇物異事  
首卷有地理略後有讚文

述異記二卷

右梁任昉撰昉家藏書二萬采前世異聞成書

譚賓錄十卷

右唐胡璩子溫撰皆唐朝史之所遺文武聞人

劇談錄三卷

右唐駟字駕言撰乾符中登第書載唐世故事

因話錄六卷

右唐趙璘撰字澤章大中衢州刺史記唐史逸事

戎幕閑談一卷

右唐韋絢撰大和中為李德裕從事記德裕所談

劉公嘉話錄一卷

右唐韋絢撰劉公謂禹錫絢字文明執誼子也咸通中節度義武幼從學於禹錫錄其話言

家學要錄一卷

右唐柳程撰採其曾祖彥昭祖芳父冕家集所記累朝典章因革時政得失著此錄小說之尤者也

常侍言旨一卷



右唐柳程記其世父登所著六章上清劉幽求二傳附  
樹萱錄一卷

右序謂纂尚書衆陽公所談

陸氏集異記二卷

右唐陸勳纂語恠之書也凡三十二事

資暇三卷

右唐李庠又濟翁撰序稱世俗之談類多訛誤雖有  
見聞嘿不敢證故著此書上篇正誤中篇譚原下篇  
本物以資休暇云

封氏見聞記五卷

右唐封演撰分門記儒道經籍人物地理雜事且辨俗說訛謬蓋著其所見聞如此

芝田錄一卷

右叙謂嘗憩緱氏故取潘岳西征賦名其書記隋唐雜事未詳何人摠六百條

朝野僉載補遺三卷

右唐張鷟文成撰分三十五門載唐朝雜事鷟自號浮休子蓋取莊子其生也浮其死也休之義

雲溪友議三卷

右唐范攄撰記唐開元以後事攄五溪人故以名其書



杜陽雜編三卷

右唐蘇鸚字德祥光啓中進士家武功杜陽川雜錄  
廣德以至咸通時事

金華子三卷

右唐劉崇遠撰金華子崇遠自號也錄唐大中後事  
一本題曰劉氏雜編

乾饌子三卷

右唐溫庭筠撰序謂語恠以悅食負無異饌味之適口  
故以乾饌命篇

幽閑鼓吹一卷

右唐張固撰紀唐二十餘事懿僖間人

酉陽雜俎二十卷續十卷

右唐段承式撰自序云縫掖之徒及恠及戲無侵於  
儒詩書爲大羹史折俎子爲醯醢大小二酉山多藏  
奇書故名酉陽雜俎分三十門爲三十卷其後又續  
十卷

北夢瑣言三十卷

右荆南孫光憲撰取傳畋於江南之夢以其爲高氏  
從事在荆江之北故以命篇記唐至五代及十國雜事  
朝廷卓絕事一卷

右唐陳峒撰記唐朝忠賢卓絕五十事

卓異記一卷

右唐李翱撰或題云陳翱記唐室功業特異并其臣美事二十七類

撫言十五卷

右唐王定保撰八十三門記唐朝進士應舉登科雜事  
宣室志十卷

右唐張讀聖朋撰纂輯仙鬼靈異事名曰宣室志者  
取漢文召見賈生論鬼神之美苗台符為之序

洽聞記三卷

右唐鄭常撰記古今神異詭譎事凡百五十六條或題曰鄭遂

續玄怪錄十卷

右唐李復言撰續牛僧孺書也

異聞集十卷

右唐陳翰編以傳記所載唐朝奇怪事類爲一書

甘澤謠一卷

右唐袁郊撰載譎異事九章咸通中久雨卧疾所著故曰甘澤謠

稽神錄十卷



右南唐徐鉉撰記恠神之事序稱自乙未歲至乙卯  
凡二十年僅百五十事楊大年云江東布衣蒯亮好  
大言夸誕鉉喜之館于門下稽神錄中事多亮所言  
河東記三卷

右不著撰人亦記譎恠之事

博異志

右題曰谷神子纂不知撰人志恠之書也

北里志一卷

右唐孫棨撰記大中進士游俠邪雜事

集異記三卷

右唐薛用弱撰集隋唐間譎詭之事一題古異記

尚書故實一卷

右唐李綽編崇文目謂尚書卽張延賞也綽記延賞所談故又題曰尚書談錄按其書稱嘉貞爲四世祖疑非延賞也

唐語林十卷

右未詳撰人效世說體分門記唐世事新增嗜好等十七門餘仍舊云

史話三卷

右不題撰人自後漢及江左朝野雜事皆記之

傳奇三卷

右唐裴鉶撰鉶高駢客故其書所記皆神仙怪譎事駢之惑呂用之未必非鉶輩導諛所致

稽神異苑十卷

右題云南齊焦度撰雜編傳記鬼神變化及草木禽獸妖恠譎詭事按焦度南安氏也質訥朴戇以勇事高帝決不能著書又卒於建元四年而所紀有梁天監中事必非也唐志有焦路窮神秘苑十卷豈即此書而相傳之訛與

賈氏談錄一卷

右偽唐張洎奉使來朝錄典客賈黃中所談二十餘事歸獻其主

祕閣閑談五卷

右皇朝吳淑撰記祕閣同僚燕談

洞微志十卷

右皇朝錢希白述記唐以來詭譎事

乘異記三卷

右皇朝張君房撰其序謂乘者載記之名異者非常之事蓋志鬼神變恠之書凡十一門七十五事

郡閣雅言一卷

右皇朝潘若同撰 太宗時守郡與僚佐話及南唐  
野逸賢哲異事佳言輒疏之于素凡五十六條以資  
雅言或題曰郡閣雅談

楊文公談苑八卷

右皇朝宋庠編初楊公億里人黃鑑哀撰平生異事  
爲一編庠取而刪類之分爲二十一門

晉公談錄一卷

右皇朝丁謂封晉公不知何人記其所談此書襄陽  
董識得之於洪州潘延之晉公甥也疑延之所作

江鄰幾雜誌

右皇朝江休復撰休復歐陽永叔之執友其所記精博絕人遠甚鄰幾其字也

景文筆錄三卷

右皇朝宋祁撰皆故事異聞嘉言輿論可爲談助不知何人所編每章冠以公曰景文乃祁謚也

東齋記十卷

右皇朝范鎮景仁元豐中撰序言旣謝事日於東齋燕坐追憶在朝時交遊言語與夫俚俗傳說因纂集成一編崇觀間以其及國朝故事禁之

該聞錄十卷

右皇朝李旼撰旼蜀人張詠客也與范鎮友善熙寧中致事歸與門人賓客燕談衮衮忘倦門人請編錄遂以該聞爲目又有雜詩十二篇系于後

筆談二十六卷

右皇朝沈括存中撰括好功名城永樂不克貶死而實高材博學多技能音律星曆尤邃自序云退處林下深居絕過從所談者唯筆硯而已故以命其書凡十七日

春明退朝錄三卷

右皇朝宋敏求次道撰多記國朝故典其序云熙



寧三年予奉朝請于春明里因纂所聞見

湘山野錄四卷

右皇朝熙寧中僧文瑩撰記 國朝故事

孔氏雜記一卷

右皇朝孔武仲撰論載籍中前言徃行及國家故實  
賢哲文章亦時記其所見聞者

倦遊雜錄八卷

右皇朝元豐初張正撰序言倦遊云者仕不得志聊  
書平生見聞將以信于世也自以非史官雖善書惡  
而不敢褒貶

玉壺清話十卷

右皇朝僧文瑩元豐中撰自序云文瑩收國初至熙寧中文集數千卷其間神道墓誌行狀實錄奏議之類輯其事成一家言玉壺隱居之潭也

衣冠嘉話一卷

右未詳何人撰記國初至熙寧中雜事

南遷錄二卷

右皇朝張舜民字公叟撰舜民元豐中從軍攻靈州師還謫授郴州監酒即日之官記塗中所歷并其詩文

茹亭客話十卷

右皇朝黃休復撰茹亭其所居也暇日賓客話及  
虛無變化謠俗卜筮畦異端而合道旨屬懲勸者皆  
錄之

澠水燕談十卷

右皇朝王闢紹聖間撰澠水其退居之地也闢從仕  
四方與賢士大夫燕談有可取者輒紀之久而得三  
百六十餘事

漁樵閑話二卷

設漁樵問答及史傳雜事不知何人所爲

後山詩話二卷

右皇朝陳師道無已撰論詩七十餘條

續詩話一卷

右皇朝司馬光君實撰序云詩話尚有遺者歐公文章聲名雖不可及然記事一也故敢續之

東坡詩話二卷

右皇朝蘇軾號東坡居士雜書有及詩者好事者因集之成二卷

歐公詩話一卷

右皇朝歐陽脩永叔撰脩退居汝陰戲作此以資談笑

中山詩話三卷

右皇朝劉攽貢父撰多及歐梅蘇石攽以博學名世  
如言蕭何未嘗掾工曹亦有誤謬

詩眼一卷

右皇朝范溫元實撰溫范祖禹之子學詩於黃庭堅  
歸叟詩話六卷

右皇朝王直方立之撰直方自號歸叟元祐中蘇子  
瞻及其門下士以盛名居北門東觀直方世居浚儀  
有別墅在城南殊好事以故諸公亟會其家由是得  
聞緒言餘論因輯成此書然其間多以己意有所抑  
揚頗失是非之實宣和末京師書肆刻印鬻之羣從

中以其多記從父詹事公話言得之以呈公取覽之不懌曰皆非我語也

東軒筆錄十五卷續錄一卷

右皇朝魏泰撰襄陽人曾布之婦弟為人無行而有口頗爲鄉里患苦元祐中紀其少時公卿間所聞成此編云

冷齋夜話六卷

右皇朝僧惠洪撰崇觀間記一時雜事惠洪喜遊公卿之門後坐事配隸嶺表

青瑣高議十八卷

右不題撰人載 皇朝雜事及名士所撰記傳然其所書且辭意頗鄙淺

雲齋廣錄十卷

右皇朝政和中李獻民撰分九門記一時奇麗雜事  
遜齋閑覽十四卷

右皇朝陳正敏崇觀間撰正敏自號遜翁錄其平昔所見聞分十門爲小說一篇以備異日披閱

勸善錄六卷

右皇朝周明寂元豐中纂道釋神奇禍福之効前人爲傳記者成一編以誠世



勸善錄拾遺

右不題撰人疑亦明寂所纂僅百事

悅神集一卷

右不題撰人記滑稽之說唐有邯鄲淳笑林此其類也

漫叟見聞錄一卷

右不知何人建炎中所撰也

碧雲霞兩卷

右皇朝梅堯臣聖俞撰碧雲霞馬名以旋毛貴陰詆

范文正公

劉餗小說十卷

右唐劉餗撰<sub>纂</sub>周漢至晉江左雜事

皮氏見聞錄五卷

右唐皮光業撰光業唐末爲錢鏐從事記當時詭異

見聞

洛中紀異十卷

右皇朝秦再思撰記五代及國初讖應雜事

牧豎附談

右皇朝景渙撰多記奇器異物渙自號玉壘山閑吟

牧豎云

南郡新書五卷

右皇朝錢希白撰記唐朝雜事

括異志纂十卷

右皇朝張師正撰師正游宦四十年不得志於是推變恠之理參覓聞之事得二百五十篇

祖異志十卷

右皇朝聶由撰由天禧中舉進士第不中因記近時說聞異見一百餘事

鷄跖集十卷

右未詳撰人纂集書傳中瑣碎佳事分門編次之傳曰善學者如齊王之食鷄跖如其名書之意殆以此也

幕府燕間錄十卷

右皇朝畢仲詢景儒撰仲詢元豐初為嵐州推官纂  
當代恠竒可喜之事為二十門

羣書古鑑一卷

右未詳何人所撰熙寧間集書史中相術驗者

稗官志一卷

右皇朝呂大辨撰雜記其所聞前言往行

師友談記一卷

右皇朝李廌方叔撰多記蘇子瞻范純夫及四學士  
所談論故曰師友

龍川略志六卷龍川別志四卷

右皇朝蘇轍撰元符二年夏居循州杜門閉目追惟  
平昔使其子遠書之千紙凡四十事其秋復記四十  
七事龍川循州地名

天文卜筭類

司天考占星通玄寶鏡一卷

右題曰巫咸氏 皇朝興國中詔天下知星者詣京  
師未幾至者百許人坐私習文或誅配隸海島由是  
星曆之學殆絕

甘石星經一卷

右漢甘公石申撰以日月五星三垣二十八宿恒星  
圖象次舍有占訣以候休咎

合元萬分曆一卷

右唐曹氏撰未知其名曆元起唐高宗顯慶五年庚  
申蓋民間所行小曆也本天竺曆爲法李獻臣云

集聖曆一卷

右皇朝楊可撰推神物所向擇日辰吉凶應用之法  
步天歌一卷

右未詳撰人二十八舍地歌也三垣頌五星凌犯賦  
附于後或云唐王希明自號丹元子

五行類

八五經三卷

右序云黃帝書八五謂八卦五行雖後人依託者而其辭亦訓雅相墓書也

青囊本旨一卷

右不記撰人演郭璞相墓青囊經也

洞林別訣一卷

右江南范越鳳集郭璞所記諸家地里得失爲此書二十四篇并司空珽尋龍入式歌附

珞珞子三命賦一卷

右李獻臣云珞珞者取珞珞如玉珞珞如石之義推  
人生吉凶否泰之法

李虛中命書三卷

右唐李虛中撰虛中字常容姓纂云同之八代孫學  
最深於五行書壽夭貴賤利不利輒先處其年時萬  
不失一韓愈言同爲虛中十一世祖誤也

五行秘訣一卷

右皇朝林開撰

占燈法一卷

右唐李淳風撰崇文總目亦有之



觀燈法一卷

右唐李淳風撰

神中記一卷

右皇朝唐潛撰辨人形色相知其壽夭吉凶

集聖曆四卷

右皇朝楊可集可為司天冬官正輯古今陰陽書彙為四時以消擇日辰云

兵家類

六韜六卷

右周呂尚撰案漢藝文志無此書梁隋唐始著錄分

文武龍虎豹犬六目兵家權謀之書也

魏武注孫子一卷

右吳孫武撰魏武帝注按藝文志孫子兵法八十二篇今魏武所注止十三篇杜牧以爲武書數十萬言魏武削其繁刺筆其精粹成此書云其序略曰吾讀兵書戰策多矣武所著深矣

李筌注孫子三卷

右唐李筌注以魏武所解多誤約廢茂史依遁甲注成三卷

杜牧注孫子三卷

右唐杜牧之注牧以武書大略用仁義使機權曹公所注解十不釋一而其所得自爲新書亦因備注之世謂牧慨然最喜論兵欲試而不得其學能道春秋戰國時事甚博而詳知兵者將有取焉

陳皞注孫子三卷

右唐陳皞撰皞以曹公注隱微杜牧注闊踈重爲之注云

紀燮集注孫子三卷

右唐紀燮集唐孟氏賈林杜佑三家所解

梅暉俞注孫子三卷

右皇朝梅堯臣聖俞注歐公爲之序

王哲注孫子三卷

右皇朝王哲撰哲以古本校正闕誤又爲之注仁廟時天下久承平人不習兵元昊旣叛邊將數敗朝廷頗訪知兵者士大夫人言兵矣故本朝注解孫武書者大抵皆當時人也

何氏注孫子三卷

右不題姓氏近代人也

吳子三卷

右魏吳起撰言兵家機權法制之說唐陸希聲類次

爲之說料敵治兵論將變動勵士凡六篇云

司馬法三卷

右齊司馬穰苴撰威王使大夫追論古者司馬兵法而附穰苴於其中因號司馬穰苴兵法司馬遷謂其書闕

黃石公三略三卷

右題曰黃石公上中下三略其書論用兵機權之妙嚴明之決軍可以死易生國可以存易亡經籍志云下邳神人撰世傳此即光上老人以一編書授漢張良者

尉繚子五卷

右尉繚子未詳何人書上刑法兵戰按漢藝文志有二十九篇今逸五篇首篇稱梁惠王問意者魏人與張橫渠注尉繚子一卷

右皇朝張載撰其辭甚簡略

李衛公對問三卷

右唐李靖對太宗問兵事元豐中并六韜孫吳三略尉繚子司馬兵法類為一書頒之武學名曰七書史臣謂李靖兵法世無完書略見於通典今對問出於阮逸家或云逸因杜氏附益之

李臨淮武記一卷

右唐李光弼撰其書凡五十五章末云呂望智窮而遠  
孫武思幽而密黃石寬而重斷吳起嚴而貴勇墨翟  
守而無攻老聃勝而不美今擇其精要雜以愚識為  
一家之書或題曰光弼從事張參所纂云

人事軍律三卷

右皇朝符彥卿撰其序稱言兵者多雜以陰陽殊不  
知往亡宋捷甲子胡興聽入梟集翻成吉兆故此但  
述人事云或以為唐僧利正撰當考之

庚衮保聚圖一卷

右晉庾袞撰袞字叔褒西晉末保禹山張泓張昌不能犯所全活者母慮數百萬元康三年己酉因撰保聚壘議二十篇

武侯十六策一卷

右蜀諸葛亮孔明撰序稱謹進便宜十六事一治國二君臣三視聽四納言五察疑六治民七舉措八考黜九治軍十賞罰十一喜怒十二治亂十三教令十四斬斷十五思慮十六陰祭陳壽錄孔明書不載此策疑依託者

神武祕要十卷



右皇朝 仁宗御撰纂古今兵書戰策及舊史成敗  
之迹類權謀形勢陰陽技巧九門

左氏要類

右皇朝韓迪撰纂左氏兵事凡五十門

類書類

同姓名錄三卷

右梁元帝撰纂類歷代同姓人成書一卷唐陸善經  
續增廣之

初學記三十卷

右唐徐堅等撰初張說類集事要以教諸王開元中

詔聖與章述余欽施敬本張烜李銳孫季良分門撰次  
藝文類聚一百卷

右唐歐陽詢等分門類事兼采前世賦詩銘頌文章  
附于逐目之後按唐志詢與令狐德棻袁朗趙智弘  
同修

古今刀劍錄一卷

右唐梁陶弘景撰記古今刀劍

古鏡記一卷

右未詳撰人纂古鏡故事

六帖三十卷

右唐白居易撰以天地事物分門類爲對偶而不載所出書曾祖父祕閣公爲之注行于世世傳居易作六帖以陶家餅數十各題名目置齋中命諸生採集其事類投餅內倒取之抄錄成書故所記時代多無次序云

記室新書三十卷

右唐李途撰采摭故事綴爲偶儷之句分四百門途爲東川掌記因以名其書云

兔園策十卷

右唐虞世南撰奉王命纂古今事爲四十八門皆偶

儷之語

戚苑英華十卷

右唐袁悅重修本楊名所著悅掇其要類爲對以他  
說附益之

通典二百卷

右唐杜佑撰先是劉秩採經史自黃帝迄唐天寶末  
制度沿革廢置論議得失倣周禮六官法爲政典三  
十五篇房琯稱才過劉向佑以爲未盡因廣之參以  
新禮爲二百篇以食貨選舉職官禮樂刑法州郡邊  
防八門分類序載世推該洽九三十六年成書德宗

時上之

五代會要三十卷

右皇朝王溥等撰采梁至周典故纂次建隆初上之節國朝會要十二卷

右皇朝章得象等天聖中被詔以國朝故事因革制度編次宋綬馮元李淑王舉正王洙同修得象監總慶曆四年書成上之凡一百五十卷范師道以其猥冗節其要以備檢閱

古城塚記二卷

右唐皇甫覽撰記古城新築之人姓名初不及塚而

名曰城塚記未知其說

太平總領五十卷

右皇朝李昉等撰太平興國中昉被詔纂經史故事分門編次六帖初學記之類也

職林二十卷

右皇朝楊侃纂集歷代職官沿革之故蓋因通典職官門增廣而已

書林韻海一百卷

右不題撰人分門依韻纂經史雜事以備尋閱或云皇朝許冠所編

異號錄二十卷

右皇朝馬永易明叟編古今殊異名號如銅馬帝無愁天子之類頃嘗見近世人增廣其書名曰寶貨錄亦殊該博

硯譜二卷

右皇朝唐詢撰記硯之故事及其優劣以絲石為第一端石次之

古鼎記一卷

右唐虞協撰記古人鑄鼎本原及其形製

洽聞記三卷

右不題撰人分二十門雜記經史名數或題童子浴  
聞記云唐許塾撰

骨鯁集二十卷

右皇朝靖康初復修 祖宗故事時人或集 本朝  
諸公諫疏成此書

書叙指南二十卷

右皇朝任浚撰纂集古今文章碎語分門編次之凡  
二百餘類

歌詩押韻二十四卷

右皇朝楊咨撰裒集古今詩可以爲矩矱者編爲押韻



侍女小名錄一卷

右皇朝王銍纂序云天觀中居汝陰與洪炎王父遊  
讀陸魯望小名錄戲徵古今女侍名字因盡發所藏  
書籍餘月而成焉

香譜一卷

右皇朝洪芻駒父撰集古今香法有鄭康成漢宮香  
南史小宗香直誥嬰香戚夫人迎駕香唐負半千香  
所記甚該傳

荆楚歲時記一卷

右梁宗慄撰其序云傳玄之朝會杜駕之上巴安仁

秋興之叙君道娛蜡之述其屬辭則已洽其比事則未弘其率爲小記以錄荆楚歲時自元日至除夕凡二十餘事

雜藝術類

古畫品錄一卷

右南齊謝赫撰言畫有六法分四品

續畫記一卷

右唐李嗣真撰謝赫之闕

後畫錄一卷

右唐僧彥悰品長安名畫凡二十七人

名畫獵精六卷

右唐張彥遠纂記歷代畫工名姓自史皇以降至唐朝及論畫法并裝背褙軸之式鑒別閱玩之方

書畫史二卷

右皇朝米芾元章撰輯本朝公卿士庶家藏法書名畫論其優劣真僞

五代名畫補遺一卷

右皇朝劉道成纂符嘉祥撰序云胡嶠嘗有梁朝名畫目因廣之故曰補遺

聖朝名畫評三卷

右皇朝劉道成纂符嘉應撰集 本朝畫工之名世者第其品以王瓘為神品云在吳生上

益州名畫錄三卷

右皇朝黃休復纂唐虢符初至宋乾德歲休復在蜀中目擊圖畫之精者五十八人品以四格云

射評要略一卷

右題曰李廣撰凡十五篇

嚴悟射訣一卷

右唐王思永撰思永學射法於成都工曹嚴悟成書十篇每篇首必稱師曰

木射圖一卷

右唐陸秉撰爲十五筍以代侯擊地毬以觸之筍飾以朱墨字以貴賤之朱者仁義禮智信溫良恭儉讓墨者慢傲佞貪濫仁者勝濫者負而行一賞罰焉

投壺經一卷

右唐上官儀奉勅刪定史玄道續注采周顛郝同梁簡文數家書爲之唐志有其目

樗蒲經一卷 樗蒲格一卷

右不題撰人序云樗蒲古之戲也劉毅李安民慕容寶之徒皆擲盧不聞餘采今以盧三擲爲上雞犢次之

釣鼈圖一卷

右不題撰人凡四十類各有一詩

採珠局一卷

右不題撰人序云王公而不知其名凡三十餘類亦各有一詩

彈棊經一卷

右未詳撰人序稱世說曰魏武帝好彈棊宮中皆効之難得其局以粧奩之蓋形狀相類就蓋而彈之俗中因謂魏宮粧奩之戲按西京雜記云劉向作彈棊典論云前代馬合卿長公皆工彈棊然則起自漢朝

非自魏始世說誤矣

象碁經一卷

右皇朝尹洙撰凡五圖今世所行者不與焉

捉卧甕人事數一卷

右皇朝李庭中撰以畢卓嵇康劉伶阮孚山簡阮籍儀狄顏回屈原陶潛孔融陶侃張翰李白白樂天爲目有趙昌言序

雙陸格一卷

右不題撰人其法左右十二梁設二朋朋各十五子一白一墨用明瓊二各以其采由右歸左子單則他

子得擊兩子以上他子雖相當不得擊故武后夢雙六不勝狄仁傑所以云無子也

益津射格一卷

右皇朝錢師益序以五善圖及武陵格踈密不同參酌爲之

三國圖格一卷金龍戲格一卷打馬格一卷  
旋棊格一卷

右不題撰人

漢官儀彩選一卷

右皇朝劉敞撰刪取西漢之官而附其列傳黜陟可



戲笑者雜編之以爲博奕之一物

忘憂集三卷

右皇朝劉仲甫編載唐晁廷祐其訣并古今其茶圖

六問筭法五卷

右皇朝龍受益撰并化零歌附

應用筭三卷

右皇朝蔣舜元撰

醫家類

黃帝素問二十四卷

右唐王冰注叙謂漢藝文志有黃帝內經十八卷素

問卽其經之九卷兼靈樞九卷迺其數焉先是第七  
云逸砭時始獲乃詮次注釋凡八十一篇二十四卷  
今又亡刺法本論二篇砭自號啓玄子

黃帝八十一難經一卷

右秦越人撰吳呂廣注唐楊玄操演越人授堯君祕  
術洞明醫道采黃帝內經精要之說凡八十一章編  
次爲十三類其理趣深遠非易了故名難經

補注神農本草二十卷

右皇朝掌禹錫等補注舊說本草經神農所作而藝  
文志所不載平帝紀詔天下舉通知方術本草者本

草之名蓋起于此梁之錄載神農本草三卷書中有後漢郡縣名蓋上世未著文字師學相傳至張機華佗始爲編述嘉祐初詔禹錫與林億蘇頌張洞等爲之補注以開寶本草及諸家參校采拾遺逸判定新舊藥合一千八十二種摠二十卷

圖經本草二十卷目錄一卷

右皇朝蘇頌等撰先是詔掌禹錫林億等六人重校神農本草累年成章奏御又詔郡縣圖上所產藥本用永徽故事重命編述於是頌再與禹錫等哀集衆說類聚詮次各有條目云嘉祐六年上

脉經十卷

右晉王叔和撰纂岐伯華佗論書論脉要訣

巢氏病源候論五卷

右隋巢元方等撰元方大業中被命與諸醫共論衆病所起之源 皇朝昭陵時詔校本刻牘頒行宋綬爲序

外臺祕要方四十卷

右唐王燾撰燾之序云嘗得古方書數千百卷因述諸病證候刪集方藥符禁鍼灸之法

本草廣義二十卷

右皇朝寇宗奭編以本草二部著撰之人或執用已私失於商榷併行諸家之說參之事實覈其情理證其誤脫以成其書

天元玉策三十卷

右啓元子撰即唐王珣也書推五運六氣之變

產寶二卷

右僞蜀昝毅撰輯產乳備驗方藥三百七十八首

銅人腧穴鍼灸圖三卷

右皇朝王惟德撰仁宗嘗詔惟德考次鍼灸之法鑄銅人爲式分腑臟十二經旁注俞穴所會刻題其

名并爲圖法并主療之術勒刻板傳于世夏竦爲序  
明堂者謂雷公問道黃帝授之故名云

太醫局方十卷

右元豐中詔天下高手醫各以得効秘方進下太醫  
局驗試依方製藥醫之仍摸傳于世

沈存中良方十五卷

右皇朝沈括存中撰博學通醫術故類其經驗方成  
此書用者多驗或以蘇子瞻論醫藥雜說附之

靈苑方二十卷

右皇朝沈括存中編本朝士人如高若訥林億孫

竒龐安常皆以善醫名世而存中尤喜方書此中所載多可用

博濟方五卷

右皇朝王袞撰

錢氏小兒方八卷

右皇朝錢乙仲陽撰 神宗時擢太醫丞於書無所不窺它人靳靳守古獨度越縱全卒與法合尤邃本草多識物理辨正闕誤最工療嬰孺病年八十二而終閭孝忠方附于後

蘇沈良方十五卷

右皇朝沈括通醫學嘗集得效方成一書後人附益以蘇軾醫藥雜說故曰蘇沈

南陽活人書二十卷

右皇朝朱肱撰序謂張長沙傷寒論其言雅奧非精於經略不能曉會頃因投閒設爲對問補苴綴緝僅成卷軸作於己巳成于戊子計九萬一千三百六十八字

神仙類

黃庭內景經一卷

右題太帝內書藏湯谷陰三十六章不載注人皆七



言韻語叙云扶桑太帝命湯谷神王傳魏夫人一名東華玉篇黃者二儀正色庭者四方之中近取諸身以脾爲主故曰黃庭

黃庭外景經一卷

右叙謂老子所作无陽子注分上中下三篇亦皆七言韻語元陽子不詳其人

老君內觀經一卷

右凡十二章首皆云老君曰其言皆修心鍊神之法

真誥七卷

右梁陶弘景撰皆真人口受之誥故以爲名記許邁

許謚楊義諸仙受道之說

參同契三卷

右漢魏伯陽撰按神仙傳伯陽會稽上虞人通貫詩律文辭瞻博修真養志約周易作書凡九十篇徐氏箋注桓帝時以授同郡淳于叔通因行于世彭曉爲之解隋唐書目皆不載按唐陸德明解易序云虞翻注參同契言字從日下月今此書有日月爲易之文則其爲古書明矣

坐忘論一卷

右唐司馬丞植字子微撰凡七篇其後有文元公跋

謂子微之所謂坐忘即釋氏之言宴坐也

肇論四卷

右姚秦僧洪肇撰師羅什規模莊周之言以著此書  
物不遷不真空涅槃無知般若無名四論傳燈錄云  
肇後爲姚興所殺高僧傳不載其事

天隱子一卷

右唐司馬子微爲之序云天隱不知何許人著書八  
篇修鍊形氣養和心靈歸根契於伯陽遺照齊平莊  
叟殆非人間所能力學者王古以天隱子即子微也  
一本有三宮法附于後

羣仙會真記五卷

右唐施肩吾集言鍊養形氣補毓精神成內丹之法  
凡二十五篇

王氏神仙傳

右僞蜀杜光庭纂光庭集王氏男真女仙五十五人  
以諂王建其後又有王虛中續纂三十人附于後

神仙傳

右晉葛洪之弟子滕升嘗問曰古之仙者豈有其人  
乎洪荅云秦阮倉君所記有數百人劉向所纂又七十  
一人今復錄集古之仙者以傳真識之士云

釋書類

維摩詰所說經三卷

右姚秦僧鳩摩羅什譯什與其弟子肇生等注十畧楞伽經四卷

右宋天竺僧求那跋陀羅譯元魏時僧達摩以付僧慧可曰吾觀中國所有經教唯楞伽可以印心謂此書也

金剛經會解一卷

右後秦僧鳩摩羅什譯唐僧宗密僧知恩 皇朝元仁賈昌朝王安石五家注

般若波羅蜜多心經集解一卷

右唐陳留僧玄奘譯并注長安中僧法藏爲之疏元豐中僧法泉亦注之

圓覺經疏三卷

右唐長壽二年天竺僧覺救譯宗密疏解

大佛頂首楞嚴經疏二十卷

右唐神龍二年中天竺國僧彼岸於廣州譯房融筆授皇朝僧子璿撰疏王隨爲之序

宗鏡錄一百卷

右皇朝僧延壽撰壽因讀楞伽經云佛語心爲宗乃

制此錄設或人問即引大藏經云以答之凡一百卷

楞嚴標指要義十卷

右皇朝僧月公撰其弟子應乾錄范岫為之序

圭峯原人論一卷

右唐僧宗奭撰斥執迷褊淺直顯真源會通本末凡四篇

弘明集十四卷

右梁釋僧祐纂采前代勝士書記文述有益於釋教者多宗炳何尚之輩著述

六祖壇經二卷

右唐僧惠昕撰記僧盧慧能學佛本末慧能號六祖  
九十六門周希後有序

龐居士語錄十卷

右唐龐蘊襄陽人與其妻子皆學佛後人錄其名言  
成此書

景德傳燈錄二十卷

右皇朝僧道原編其書披奕世祖圖采諸方語錄由  
七佛以至法眼之嗣凡五十二世一千七百一人獻之  
朝詔楊億李維王曙同加裁定億等潤色其文是正  
其差繆上之遂大行于世為禪學之祖



傳燈玉英集十五卷

右皇朝王隨撰以傳燈錄繁冗難觀刪爲此錄景祐甲戌上之詔書獎荅有序附于後

天聖廣燈錄三十卷

右皇朝李遵勗編斷自釋迦以降 仁宗御製序

分燈集二十五卷

右皇朝井度編蓋續三燈錄也

禪苑瑶林一百卷

右皇朝井度編取三燈錄所載祖師言行附入諸方拈提語句且是正其差誤云

林間錄二卷

右皇朝僧德洪撰記高僧嘉言善行謝逸爲之序然多寓言如謂杜邾公張安道皆致仕居睢陽之類是也按邾公慶曆六年致仕治平中薨安道元豐末始請老蓋相去二十年矣其踈闊可笑也

雪竇頌古八卷

右皇朝僧道顯撰居雪竇山

注維摩詰經十卷

右後秦羅什譯什又與其高弟生摩訶融注釋之淳化中張齊賢刻之板

忠國師多心經一卷

右唐僧慧忠肅宗師事之此其所著書也

六祖解心經一卷

右唐僧惠能解

法界觀一卷

右唐僧杜順撰華嚴經最後品名曰法界叙善財參五十二位善知識經文廣博罕能通其說杜順乃著是書宗密注之裴休為之序

法界觀據一要記四卷

右皇朝僧遵式述其序云元豐初覽清涼玄鏡圭峯

注取其合者錄之

六祖壇經二卷

右唐僧慧能授禪學于弘忍韶州刺史韋據請說無相心地戒門人紀錄目曰壇經盛行于世

華嚴經決疑論四卷

右唐李通玄撰太原人則天朝撰華嚴合論又著此書皇朝張商英使河東得之壽陽縣東浮屠廢書中

會解楞嚴經十卷

右唐僧彌伽釋語房融筆授皇朝井度集古今十

二家解去取之成此書

修已金剛經旨要一卷

右皇朝僧修已住持峨眉山白水寺道楷之法嗣也  
釋氏要覽十卷

右皇朝僧道誠集雜錄釋典旁采書傳分門編次  
成二十類天禧三年書成

高僧傳六卷

右梁僧惠敏撰分譯經義解兩門

求法高僧傳兩卷

右唐僧義淨撰淨垂拱中往天竺求佛經既還因纂

集唐僧往西域者五十六人行事

僧寶傳三十卷

右皇朝僧德洪撰其序云五家宗派嘉祐中達觀雲  
穎嘗爲之傳載其機緣語句而略其終始行事德洪  
謂入道之緣臨終之効有不可闕者遂盡掇遺編別  
記補以諸方之傳又自嘉祐至政和取雲門臨濟兩  
宗之裔絕出者合八十七人各爲傳系之以禪具云

錦囊集一卷

右皇朝僧瑞光集皆教其徒答問語也

昭德先生郡齋讀書志卷第三下

昭德先生郡齋讀書志卷第四上

集部其類有三一曰楚辭類二曰別集類三曰雜集

類內別集猥多復分為一中下昔屈原楚辭騷雖詭

謫不槩諸聖而英辯藻田閎麗演迤發於忠正蔚然

為百代詞章之祖眾士苴鄉嚮波屬雲委自時厥後綴

文者接踵於斯矣然軌齟不同機杼亦異各名一家

之言學者欲矜式焉故別而聚之命之為集蓋其原

起於東京而極於有唐至七百餘家當晉之時摯虞

已患其凌雜難觀嘗自詩賦以下彙分之曰文章流

別後世祖述之而為總集蓋爾統所選是也至唐亦且



七十五家嗚呼盛矣雖然賊生於無所用或其傳不能廣值水火兵寇之厄因而散落者十八九亦有長編鉅軸幸而得存其屬目者幾希此無他凡以其虛辭濫說徒爲美觀而已無裨於用故也今錄漢迄唐附以五代本朝作者其數亦甚衆其間格言偉論可以扶持世教者爲益固多至於虛辭濫說如上所陳者知其終當泯泯無聞猶一可以自警則其無用亦有用也是以不加銓擇焉

楚辭類

楚辭十七卷

後漢校書郎王逸叔師注楚屈原名平爲懷王左徒  
博聞強志嫺於辭令後同列心害其能而讒之王怒  
疏平平自傷忠而被謗乃作離騷經以諷不見省納  
及襄王立又放之江南復作九歌天問九章遠游卜  
居漁父大招自沉汨羅以死其後楚宋玉作九辨招  
魂漢賈誼作惜誓淮南王小山作招隱士東方朔作  
七諫嚴忌作哀時命王褒作九懷劉向作九歎皆擬  
其文而哀平之死於忠至漢武時淮南王安始作離  
騷傳劉向典校經書目分爲十六卷東京班固賈逵各  
作離騷章句餘十五卷闕而不說至逸自以爲南陽

人與原同土悼傷之復作十六卷章句又續爲九思  
取班固二序附之爲十七卷按漢書志屈原賦二十  
五篇今起離騷經至大招凡六九章九歌又十八原  
賦存者二十四篇耳并國殤禮魂在九歌之外爲十  
一則溢而爲二十六篇不知國殤禮魂何以系九歌  
之末又不可合十一爲九然則謂大招爲原辭可疑  
也夫以招魂爲義恐非公作或曰景差蓋近之其卷  
後有蔣之翰跋云晁美以家本也

楚辭釋文一卷

未詳撰人其篇次不與世行本同蓋以離騷經九辯

九歌天問九章遠遊卜居漁父招隱士招魂九懷七  
諫九歎哀時命惜誓大招九思爲次按今本九章第  
四九辯第八而王逸九章注云皆解於九辯中知釋  
文篇第蓋舊本也後人始以作者先後次第之爾或  
曰天聖中陳說之所爲也

補注楚辭十七卷考異一卷

未詳撰人凡王逸章句有未盡者補之自序云以歐  
陽永叔蘇子瞻晁文元宋景文家本參校之遂爲定  
本又得姚廷輝本作考異且言辯騷非楚辭本書不  
當錄

重編楚辭十六卷

右族父吏部公重編獨離騷經仍故爲首篇其後以遠游九章九歌天問卜居漁父大招九辯招魂惜誓七諫哀時命招隱九懷九歎爲次而去九思一篇其說曰按八卷屈原遭憂所作故首篇曰離騷經篇皆曰離騷餘皆曰楚辭今本所第篇或不次序於是遷遠遊九章次離騷經在九歌上以原自叙其意近離騷經也而九歌天問乃原旣放之後據憤所作者故遷於下卜居漁父自序之餘意也故後次之大招古奧疑原作非景差辭沈淵不返故以終焉爲楚辭上

八卷九辯招菟皆宋玉或曰九辯原作其聲浮矣惜  
誓弘深或以爲賈誼作蓋近之東方朔嚴忌皆漢武  
帝庭臣淮南小山之辭不當先胡忌王褒漢宣帝時  
人後淮南小山至劉向最後作故其次序如此皆西  
漢以前文也爲楚辭下八卷王逸東漢人九思視向  
以前所作相闕矣又十七卷非舊錄故去之又頗刪  
逸離騷經訓釋淺陋者而錄司馬遷原傳冠其首云

續楚辭二十卷

右族父吏部公編擇後世文賦與楚辭類者編之自  
宋玉已下至本朝王令凡二十六人計六十篇各

爲小序以冠其首而最喜沈括以爲辭近原蓋深探其用意疾徐其步驟而與之偕然亦暇而不迫也

變離騷二十卷

右族父吏部公編公旣集續楚辭又擇其餘文賦或大意祖述離騷或一言似之者爲一編其意謂原之作曰離騷餘皆曰楚辭今楚辭又變而迺始曰變離騷者欲後世知其出於原也猶服盡而系其姓於祖云所錄自楚荀卿至本朝王令凡三十八人通九十六首

別集類上

蔡邕集十卷

右漢蔡邕伯喈陳留圉人仕至左中郎將後爲王允所害邕博學好辭章術數大文妙操音律在東觀欲補漢紀自陳十意及付獄乞黥刑以成書不能得遂死獄中所著文章百四篇今錄止存九十篇而銘墓居其半或曰碑或曰銘或曰神誥或曰哀讚其實一也嘗自云爲郭有道碑獨無愧辭則其他可知矣凡文集其人正史自有傳者止掇論其文學之辭及略載鄉里所終爵位或死非其理亦附見餘歷官與其善惡率不錄若史逸其行事者則雜取他書詳載焉



庶後有考

曹植集一卷

右魏曹植子建也太祖子文帝封植爲陳王卒年三十一謚曰思年十餘歲誦讀詩論及辭賦數十萬言善屬文援筆立成自少至終篇籍不離於手景初中撰錄植所著賦頌詩銘雜論九百餘篇今集僅二百篇通爲一卷

王粲集八卷

右後漢王粲仲宣也高平人爲魏國侍中粲博物多識彊記善筭屬文舉筆便成無所改定時人常以爲

宿製然正復精意覃思亦不能加著詩賦論議垂六十篇今集有八十一首按唐藝文志粲集十卷今云兩卷其詩文返多於史所記二十餘篇不曉其故

### 阮籍集十卷

右魏阮籍嗣宗也尉氏人籍志氣宏達博覽群籍尤好莊老屬文不留思嗜酒能嘯善彈琴當其得意忽忘形骸雖不拘禮教而發言玄遠晉帝輔政為從事中郎後求為步兵校尉

### 嵇康集十卷

右魏嵇康叔夜譙國人康美詞氣有風儀土木形骸

不自藻飾學不師授博覽該通長好莊老屬文玄遠  
以魏宗室婚拜中散大夫景元初鍾會譖於晉文帝  
遇害

張華集三卷

右晉張華茂先也范陽人惠帝時爲司空趙王倫孫  
秀黨謀害之華學業優博辭藻溫麗圖緯方伎等  
書莫不詳覽家有書三十乘天下竒祕悉在博物  
洽聞世無與比集有詩一百二十哀詞冊文二十一  
賦三

陸機集十卷

右晉陸機士衡也抗之子少有異才文章冠世伏膺  
儒術非禮不動吳滅退居舊里閉門勤學積有十年  
太康末入洛成都王穎令機率師伐長沙王又至阿  
橋大敗爲穎所誅初造張華華重其名如舊相識嘗  
謂之曰人之爲才常恨才少而子更患多葛洪著  
書亦稱歎爲所著文章凡三百餘篇今存詩賦論議  
牋表碑誄一百七十餘首以晉書文選較正外餘多  
舛誤

陸雲集十卷

右晉陸雲士龍也吳郡人惠帝時爲中書侍郎會兄

機兵敗同遇害雲六歲能屬文性清正有才理與兄齊名雖文章不及而持論過之所著文章三百四十九篇新書十篇

陶潛集十卷

右晉陶潛淵明也潯陽人晉宋史皆有傳晉安帝時爲彭澤令去職潛少有高趣好讀書不求其解著五柳先生傳以自況世號靖節先生今集有數本七卷者梁蕭統編以序傳顏延之誄載卷首十卷者北齊陽休之編以吾孝傳聖賢群輔錄序傳誄分三卷蓋之詩篇次差異按隋經籍志潛集九卷又云梁有五

卷錄一卷唐藝文志潛集五卷今本皆不與二志同  
獨吳氏西齋書目有潛集十卷疑卽休之本也休之  
本出宋庠家云江左舊書其次第最若倫貫獨四百  
目後八儒三墨二條似後人妄加

### 鮑照集十卷

右宋鮑照明遠也上黨人世祖以爲中書舍人後臨  
海王子瑱鎮荊州照爲參軍子瑒敗爲亂兵所殺孝  
武好文自謂人莫能及故照悟其旨爲文多鄙言累  
句當時謂照才盡實不然也事見沈約書而延壽史  
乃以世祖爲文帝集有唐虞炎序云爲宋景所害

儻見於他書乎唐人避武后諱改照爲昭

謝朓集十卷

右齊謝朓玄暉也陽夏人明帝初自中書郎出東海太守東昏時爲江祐黨譖害之朓少好學有美名文章清麗善草隸尤長五言詩沈約嘗云二百年來無此詩也文選所錄朓僅二十首集中多不載今附入

謝惠連集五卷

右宋謝惠連也方明子元嘉七年爲彭城王法曹行參軍十歲能屬文爲雪賦以高麗見苛族兄靈運每見其新文曰張華重生不能易也

吳均集三卷

右梁吳均叔宰也史稱均博學才俊清拔有古氣好事効之謂吳均體有集二十卷唐世搜求止得十卷文亡其七矣舊題誤曰吳筠筠乃唐人此詩殊不類而其中有贈興嗣柳貞陽輩詩固已知其非筠又有蕭子雲贈吳朝請入東詩蓋均在武帝時為奉朝請則知為均也無疑矣蕭子雲詩八蕭子顯朱异平均王僧孺詩各一附顏之推譏均集中有破鏡賦今亦云之

江淹集十卷



右梁江淹文通也濟陽人梁初為散騎常侍封醴陵侯少好學不事章句留情於文章晚節才思微退人謂才盡著述百餘篇自撰為前後集今集二百四十九篇

何遜集二卷

右梁何遜仲信也東海人終水部員外郎遜少能詩州舉秀才范雲自其文嗟賞曰觀文人質則過懦麗則傷俗能含清濁古今見之何生矣沈約謂每讀卿詩一日三復猶不能已與劉孝綽以文章見重於世謂之何劉王僧孺集其文為八卷今亡逸不全

庾信集二十卷

右周庾信子山也。出陽人。梁元帝時爲散騎常侍。聘西魏。遂留長安。孝品。凶時終司憲中大夫。信在梁與徐陵文並綺麗。世號徐庾體。集有滕王道序。

王績東臯子五卷

右唐王績無功也。龍門人。隋大業中舉孝悌廉潔。授六合丞。棄官耕東臯。自號東臯子。唐書以爲隱逸。集有呂才序。稱其幼歧嶷。年十五謁楊素。占對英辯。一坐盡傾。以爲神仙童子。薛道衡見其登龍門。憶禹賦。歎曰。今之庾信也。且載其卜筮之驗者數事云。

楊炯盈川集二十卷

右唐楊炯也華陰人顯慶六年舉神童授校書郎終  
婺州盈川令卒炯博學善屬文與王勃盧昭隣駱賓  
王以文詞齊名海內稱王楊盧駱四才子亦曰四傑  
炯自謂吾愧在盧前恥居王後張說曰盈川文如懸  
河酌之不竭恥王後信然愧盧前謙也集本三十卷  
今多亡逸

王勃集二十卷

右唐王勃子安也通之孫麟德初劉祥道薦其材對  
策高等授朝散郎沛王召署府修撰以戲爲諸王作

鬪鷄傲高宗怒斥出府父爲交趾令勃往省溺海卒  
勃屬文初不精思先磨墨數升酌飲引被覆面卧及  
寤援筆成篇不易一字時人謂之腹藁有劉元濟序

盧照隣幽憂子集十卷

右唐盧照隣昇之也洛陽人調新都尉病去官隱具  
茨山下手足攣廢疾又訣親戚自沈潁水照隣自以  
當高宗時尚吏已獨儒武后尚法已獨黃老后封嵩  
山聘賢士已已廢著五悲文今在集中嘗自號幽  
憂子

駱賓王集十卷

右唐駱賓王也義烏人武后時數言事得罪貶臨海丞不得志棄官去文明中徐敬業亂署府佐為敬業傳檄天下斥武后罪后讀之矍然及敗亡命不知所之後宋之問逢之於靈隱已祝髮為浮屠矣賓王七歲能屬文妙於五言詩中宗詔求其文得百餘篇命郗雲卿次序之

蘇頲許公集二十卷

右唐蘇頲廷石也武功人調露二年進士賢良方正異等除左司禦府胄曹玄宗時中書舍人知制誥開元四年同紫微黃門平章事頲幼敏悟一覽五千言

輒覆景龍後與張說以文章顯時號燕許李德裕謂  
近世詔誥唯頌叙事外爲文章韓休爲序集四十卷  
今亡其半矣

陳子昂集十卷

右唐陳子昂伯玉也梓州人文明初舉進士上書召  
見累擢拾遺聖曆初解官歸養父喪廬墓縣令段  
簡貪暴脅取其賂不厭逮捕死獄中子昂少以豪俠  
使氣及冠折節爲學精究墳籍耽愛黃老易象尤善  
屬文唐興文章承徐庾餘風天下祖尚至是始變雅  
正故雖無風節而唐之名人無不推之柳儀曹曰張

說以著述之餘攻比興而莫能極張九齡以比興之暇窮著述而不克備唐興以來稱是選而不作者子昂而已

宋之問考功集十卷

右唐宋之問延清也汾州人武后召與楊炯分直習藝館諂事太平公主爲考功員外郎睿宗初欽州賜死自魏建安迄江左詩律屢變至沈約庾信以音韻相婉附屬對精密及之問沈佺期又加靡麗回忌聲病約句準篇如錦繡成文學者宗之號曰沈宋徐堅嘗論之問之文如白玉無瑕不可其爲當時所

重如此

沈佺期集五卷

右唐沈佺期雲卿也相州人及進士第由協律郎遷  
弘文館直學士常侍中宴舞回波為弄辭悅帝還賜  
牙紉

杜審言集一卷

右唐杜審言口必簡也襄陽人預之後裔擢進士恃高  
才以傲世嘗對武后賦歡喜詩后歎重其文與李嶠  
崔融蘇味道為文章四友集有詩四十餘篇而已

張說集三十卷



右唐張說道濟也洛陽人永昌元年賢良方正策第一累遷鳳閣舍人睿宗時兵部侍郎平章事開元十八年終左丞相燕國公說爲文精壯長於碑志朝廷大述作多出其手常典集賢圖畫且任間爲天平軍大使及致仕一歲皆即軍中於家論譔國史晚謫岳州詩益悽惋人謂得江山助

李嶠集一卷

右唐李嶠巨山也替皇人擢進士第制策甲科爲監察御史武后時同鳳閣鸞臺平章事嶠富才思前與王勃楊炯中與崔融蘇味道齊名晚諸人沒爲文章

宿老學者取法集本六十卷未見今所錄一百二十  
詠而已或題曰單題詩有張方注

張九齡曲江集二十卷

右唐張九齡子壽也曲江人長安二年進士調校書  
郎以道侔伊呂科榮高等爲左拾遺開元中爲中書  
令卒謚文獻九齡風度蘊藉幼善屬文玄宗朝知制  
誥雅爲帝知爲相諤諤有太臣節及貶荊州惟文史  
自娛朝廷許其勝流徐堅論九齡之文如輕縑素練  
實濟時用而窘邊幅柳宗元以九齡兼攻詩文但不  
能究其極尔集後有姚子彥所撰行狀呂溫撰真贊

鄭宗珍撰謚議徐浩撰墓碑及贈司徒勅詞

王維集十卷

右唐王維摩詰也太原人開元九年進士終尚書右丞維幼能屬文工草隸善畫名盛安祿山反嘗陷賊中賊大宴凝碧池賦詩痛悼詩聞行在後得免死代宗訪維文章於第縉裒集十卷上之李肇記維漠漠水天飛白鷺陰陰夏木轉黃鸝之句以爲竊李嘉祐者今嘉祐之集無之豈肇之厚誣乎

諸光義集五卷

右唐諸光義魯人開元十四年進士嘗爲監察御

史後從安祿山僞署賊平貶死

王昌齡詩六卷

右唐王昌齡少伯也江寧人開元十五年進士爲校書郎又中宏詞不護細行貶龍標尉以世亂歸鄉里爲刺史閭丘曉所殺昌齡工詩績密而思清時謂王江寧云

常建詩一卷

右唐常建開元十五年進士

劉長卿集十卷

右唐劉長卿字文房開元二十一年進士至德中監

察御史以檢校祠部員外為轉運判官知淮西岳鄂  
轉運留後觀察使吳仲孺誣奏貶潘州南巴尉會有  
為辨者除睦州司馬終隨州刺史長卿剛而犯上故  
兩逢斥廢詩雖君子才能鍛鍊權德輿嘗謂為五  
言長城今集詩九卷雜文一卷

顏真卿文一卷

右唐顏真卿清臣也萬年人博學工辭章開元二十  
二年進士又登制科代宗時為太子太師使李希烈  
遇害世謂真卿忤楊國忠李輔國元載楊炎盧杞拒  
安祿山李希烈廢斥者七八以王於死而不自悔天

下一人而已而學問文章往往雜神仙浮屠之說不  
皆合於理而所爲乃尔者蓋天性然也

蕭穎士集十卷

右唐蕭穎士茂挺也梁宗室之後開元二十三年進  
士爲史館待制安祿山反竄山南節度崔圓授揚州  
工曹至官信宿而去客死汝南逆旅門人謚曰文元  
先生穎士屬文觀書一覽即誦通百家譜系書籍嘗  
教學濮陽時號蕭夫子李林甫惡不附已故數罷去  
閭士和盛推穎士文章以爲聞蕭氏之風者童子羞  
稱曹陸

張鷟龍筋鳳髓判十卷

右唐張鷟字文成辭章藻麗嘗入中制科此乃其書判也凡一百首自號浮休子

孟浩然詩一卷

右唐孟浩然也襄陽人工五言詩隱鹿門山年四十乃游京師一日諸名士集秘書省聯句浩然句曰微雲淡河漢踈雨滴梧桐衆皆欽伏張九齡王維雅稱道之維私邀入禁林遇玄宗臨幸浩然匿牀下維以聞上曰素聞其人因召見命自誦所爲詩至不才明主棄之句上曰不求進而誣朕棄人命放歸所著詩二

百一十首宜城處士王士源序次爲三卷今併爲一  
又有天寶中韋縉序

嚴從中黃子集三卷

右唐嚴從開元中爲著作郎春宮侍讀集賢院學士  
卒自號中黃子當時命太子侍文呂向訪遺文於家  
得訓老經頌等八篇序爲三卷

李翰林集二十卷

右唐李白太白也白舊集十卷唐李陽冰序咸平中  
樂史別得白歌詩十卷凡歌詩七百七十六篇又纂  
雜著爲別集十卷宋次道治平中得王文獻及唐魏



萬所纂白詩又哀唐類詩洎刻石所傳者通李陽冰樂史集共一千一篇雜著六十五篇曾子固乃考其先後而次第之云白蜀郡人天寶初至長安明皇召爲翰林供奉頃之不合去安祿山反明皇在蜀永王璘節度東南白時卧廬山迫致之璘敗坐繫潯陽獄崔渙宋若思驗治白以爲罪薄釋白囚使謀其軍乾元元年終以汙璘事長流夜郎釋過當塗以卒其始終更涉如此此白之詩書所自叙可考者也舊史稱白山東人爲翰林待詔又稱白在宣城謁見永王璘遂辟爲從事而新書又稱白流夜郎還潯陽坐事下

獄案若思釋之者皆不合於白之自序蓋更誤也予  
按杜甫詩亦以白爲山東人而蘇子瞻嘗恨白集爲  
庸俗所亂則白之自序亦未可盡信而以爲史誤近  
蜀本文附入左縣邑人所哀曰白隱處少年所作六  
十篇尤爲淺俗白天才英麗其辭逸蕩雋偉飄然有  
超世之心非常人所及讀者自可別其真僞也

岑參集十卷

右唐岑參南陽人文本之後天寶三年進士累官補  
闕起居郎出嘉州刺史杜鴻漸表置幕府爲職方郎  
中兼侍御史罷終于蜀參博覽史籍尤工綴文屬詞

清尚用心良苦其有所得徃徃超拔孤秀度越常情  
每篇絕筆人競傳諷至德中裴薦杜甫等常薦其識  
度清遠議論雅正佳名早立時輩所仰可以備獻替  
之官云集有杜確序

李嘉祐詩二卷

右唐李嘉祐別名從一趙州人天寶七年進士為秘  
書正字袁台二州刺史善為詩綺靡婉麗有齊梁之  
風時人以比吳均何遜云

高適集十卷集外文二卷別詩一卷

右唐高適達夫也又字仲武渤海人天寶八年舉有

道科中第永泰中終散騎常侍五十始為郎工以氣  
質自高每一篇出好事者輒傳布云

賈至集十卷

右唐賈至幼幾也洛陽人天寶十年明經擢第累官  
起居舍人知制詔從幸西川當讓傳位冊既進藁上  
曰先天誥命乃父為之今茲冊命又尔為之兩朝大  
典出卿父子可為繼美矣大曆中終散騎常侍集李  
邯鄲淑家本二十卷蘇弁編次常仲孺為序以墓銘  
叙碑列于後今亡其本蘇子瞻嘗行呂惠卿責詞有  
元兇在位之語仇人乃曰史唯宋太子劾謂之元兇

因誣其指斥殊不知曹子建責躬詩有曰元兇是率  
蓋自謂也今至制詔中除魏仲犀徐歸道詞亦以元  
兇指祿山豈獨劾爲元兇邪世多疑子瞻失詞因表  
出之

錢起詩二卷

右唐錢起徽之父也吳郡人天寶中舉進士初從鄉  
薦客舍月夜聞人哦於庭曰曲終人不見江上數峯  
青起攝衣從之無所見台天及就試詩題乃湘靈鼓瑟  
也起即鬼謠十字爲落句主文李暉深嘉之擢置高  
第釋褐授校書郎終考功與郎士元齊名時曰前有

沈宋後有錢郎

元子十卷琦玕子一卷文編十卷

右唐元結次山也後魏之裔天寶十三年進士復舉制科授右金吾丘普累遷容管經略使始在商餘山稱元子逃難入琦玕洞稱琦玕子或稱浪士漁者稱爲贅叟酒徒呼漫叟及官呼漫郎因以命其所著結性耿介有憂道閔世之意逢天寶之亂或隱自謂與贅牙豈獨其行事而然其文辭亦如之然其辭義幽約譬古鐘磬不諧於俚耳而可尋玩在當時名出蕭李下至韓愈稱數唐之文人獨及

結云

韓翃詩五卷

右韓翃君平也南陽人天寶十三年進士淄青侯希  
逸宣武李勉繼辟幕府俄以駕部郎中知制誥終於  
中書舍人雄詩興致繁富朝野重之

杜甫集二十卷集外詩一卷注杜甫詩二十  
卷蔡興宗編杜甫詩二十卷趙次公注杜詩  
五十九卷

右唐杜甫子美也審言之孫天寶十三年玄宗朝獻  
太清宮享廟及郊奏賦三篇使待制集賢院宰相試

文再遷右衛率府曹曹終於劔南參謀檢校工部員外曠放不自檢好論天下大事高而不切少與李白齊名號李杜數當寇亂挺節無污爲歌詩傷時撓弱情不忘君人憐其忠云集有王洙原叔王琪君王序本朝自王原叔以後學者喜杜詩世有爲之注者數家率皆鄙淺可笑有原甫名其實非也呂微仲在成都時嘗譜其年月近時有蔡興宗者再用年月編次之而趙次公者又以古律詩雜次第之且爲之注兩人頗以意改定其誤字人不善之

獨孤及毗陵集二十卷



右唐獨孤及至之也洛陽人天寶十三年舉洞曉玄經科代宗初爲太常博士濠舒二州刺史政最徙常州卒官自幼有成人之量徧覽五經觀其大義不爲章句學爲文以立憲誠世寔賢過惡爲用長於論議唐實錄稱韓愈師其爲文云集有李舟梁肅前後序末載崔祐甫碑誌

皇甫冉詩二卷

右唐皇甫冉茂政也丹陽人天寶十五年進士爲無錫尉歷拾遺補闕卒與弟曾齊名當時比張氏景陽孟陽云集有獨孤及序

郎士元詩

右唐郎士元字君胄中山人天寶十五年進士爲郢州刺史與錢起俱有詩名而士元尤更嫻雅時朝廷公卿出牧奉使若兩人無詩祖行人以爲愧

顧况集二十卷

右唐顧况字逋公蘇州人至德二年江東進士善爲歌詩性談諧德宗時柳渾輔政以祕書郎召况素善李泌及泌相自謂當得達官又遷著作郎及泌卒有調笑語貶饒州司戶卒集有皇甫冉詩序

陳虬詩一卷

右唐陳蛻集有長安十五詠自序蛻生長江淮間以詩句從賦僅十餘年矣今我后撫運澤及四夷蛻復得爲太平人也云云蓋肅代間人也

盧綸詩一卷

右唐盧綸與吉中孚韓翎錢起司空曙苗發崔峒耿緯夏侯審李端皆能詩齊名號大曆十才子綸字允言累舉進士不第

耿緯詩二卷

右唐耿緯寶應元年進士爲左拾遺

韋應物集十卷

右唐書應物京兆人天寶時爲三衛周道遙公負之  
後左僕射扶陽公待賈生令儀令儀生變書應物  
永泰中任洛陽丞京兆府功曹大曆十四年自鄆縣  
制除機陽令稱疾辭歸建中二年授比部郎中守滁  
州居頃之改江州召還擢左司郎中或媚其進媒孽  
之出爲蘇州刺史性高潔鮮食寡欲所居焚香除地  
而坐詩律自沈宋以後日益靡曼鏤章刻句揣摩浮  
切音韻婉諧屬對麗密而嫻雅平淡之氣不存矣獨  
應物之詩馳驟建安以還得其風格云

李端司馬集三卷

右唐李端趙州人大曆五年進士爲校書郎卒官杭州司馬郭曖尚昇平公主賢明招納士類故端等多從曖游嘗進官宴客端席上賦詩甚工一坐稱歎錢起曰素爲之請賦起姓端立獻一章云新開金埒看調馬舊錫銅山許鑄錢起乃服主喜厚賜帛

李益詩一卷

右唐李益君虞也姑臧人大曆四年進士調鄭縣尉幽州劉濟辟從事憲宗雅聞其名召爲集賢殿學士負才凌藉士衆不能堪暴其獻濟詩不上望京樓之句以涉怨望詔降秩俄復舊益少富詞藻長於歌

與宗人賀齊名每作一篇樂工以賂求取被聲歌供奉天子征人早行篇天下皆施之圖繪今集有從軍詩五十篇而無此詩惜其放逸多矣

陸贄奏議十二卷

右唐陸贄敬輿也贄嘉興人大曆八年進士中博學宏詞書判拔萃科德宗初爲翰林學士從奉天還爲中書舍人平章事贄在奉天日下詔書數百初如不細思速成皆周盡人情嘗爲帝言今盜徧天下宜痛自悔以感人心誠不吝改過以言謝天下使臣持筆忘所忌庶叛者革心上從之故下制書雖武夫悍卒

無不感動流涕議者謂興元戡難功雖瓜牙宣力蓋  
贄有助焉崔貞有榜子集五卷議論集三卷翰苑集  
十卷元祐中蘇子瞻乞校正進呈改從今名疑是哀  
諸集成此書

王建詩十卷

右唐王建也大曆十年進士為昭應縣丞太府寺丞  
大和中陝州司馬尤長宮詞

柳郊詩一卷

右唐柳郊與李端盧綸輩相酬贈大曆間進士也

武元衡臨淮集兩卷

右唐武元衡伯蒼也河南人建中四年進士元和三年以門下侍郎平章事出劔南節度八年復秉政明年早朝遇盜害之元衡工五言詩好事者傳之被於管絃嘗夏夜作詩曰夜久喧暫息池臺唯月明無因駐清景日出事還生翌日遇害舊有臨淮集七卷此其二也議者謂唐世工詩宦達者唯高適達宦詩工者唯元衡

羊士諤詩一卷

右唐羊士諤也貞元元年擢進士第順宗時為宣歙巡官王叔文所惡貶汀州寧化尉元和初李吉甫知



獎擢監察御史掌制誥嘗出爲資州刺史

麴信陵集一卷

右唐麴信陵貞元元年進士爲舒州望江令卒

楊巨濟詩一卷

右唐楊巨濟字景山貞元五年進士爲張弘靖從事

太常博士禮部員外郎

歐陽詹集十卷

右唐歐陽詹行周也泉州人貞元八年進士終國子四門助教初閩人不肯北宦及常袞爲觀察使興學勸仕第進士自詹始與韓愈李絳聯第皆天下選時

號龍虎榜云福州刺史李貽孫纂

韓愈集外文一卷

右唐韓愈退之也南陽人貞元八年進士累擢知制誥進中書舍人遷吏部侍郎爲京兆尹與李紳不協紳出愈罷爲兵部俄復舊劉昫唐書稱愈恃才肆意盪孔孟之旨若南人妾以柳宗元爲羅池神而愈碑以實之李賀父名晉肅不應進士而愈作諱辯又爲毛穎傳譏戲不近人情此文章之甚紕繆者新書稱愈三歲而孤自知讀書比長盡通六經百家學性明銳不說隨每言文章自相如子長後作者不世出故

深探本原卓然樹立成一家言造端置辭要為不襲  
蹈前人者議者謂舊史謂愈文章甚紕繆固不待辨  
而新史謂造端置辭不襲蹈前人亦未為知愈蓋愈  
之置辭字字悉有據依其造端如毛穎傳進學解之  
類皆有所師範云其集屢經名人是正其訛舛絕少  
但編次殊失倫類有暇日者宜再編之

李絳論諫集七卷

右唐李絳深之也替皇人貞元八年進士中宏詞補  
渭南尉六年進中書侍郎平章事大和初為山南西  
道節度南蠻入寇為亂兵所害絳偉儀質以直道進

退望冠一時賢不肖大分屢爲讒邪所中平生論諫  
數十百事其甥夏侯孜所編大中史官蔣偕爲序

李觀文編三卷外集二卷

右唐李觀元賓也華之從子貞元八年進士中宏詞  
科終太子校書郎觀爲文不襲前人時謂與韓愈相  
上下議者以觀少天文未極愈老不休故擅名陸希  
聲大順中編觀文爲序以爲觀尚辭故辭勝理愈尚  
質故理勝辭雖愈窮老終不能加觀之辭觀後愈死  
亦不能逮愈之質云其後蜀人趙昂又得其安邊書  
至晁錯論一十四首爲後集二卷頃年從父詹事公

掌誥命以四之日爲四日不學者闕然以爲非觀集  
中亦嘗如此用不知本于此

柳宗元集三十卷集外文一卷

右唐柳宗元子厚也後魏濟陰公某之裔貞元九年  
進士中博學宏詞科授校書郎終於柳州刺史宗元  
少精敏絕倫文章卓偉精緻旣竄斥埋厄感鬱一寓  
諸文倣離騷數十篇讀者悲惻在柳州進士走數千  
里從學經指授者文辭皆有法世號柳州韓愈評其  
文曰雄深雅健似司馬子長崔蔡不足多云集中有  
御史周君碣司馬溫公考異以此碣爲周子諒碣實

開元二十五年也柳作天寶時悞按此碣殊踈略舊  
唐書紀牛仙客傳玄宗實錄皆載子諒彈牛仙客杖  
流灤州死藍田

劉禹錫夢得集三十卷外集十卷

右唐劉禹錫夢得也中山人貞元九年進士登博學  
宏詞科貶朗州司馬元和十年召還欲任南省郎作  
玄都觀看花詩譏忿當路出為播州刺史裴杜以母  
老為請得易連州入為主客郎中復作游玄都詩以  
詆權近俄分司東都遷賓客會昌時加檢校禮部尚  
書平禹錫少工文章恃才而廢老年寡所合乃以文

章自適素善詩晚節尤精白居易推為詩豪嘗言其詩在處應有神物護持禹錫早與柳宗元為文章之友稱劉柳晚與居易為詩交號劉白雖詩文似少不及然能抗衡二人間信天下之奇才也

孟東野詩集十卷

右唐孟郊東野也湖州人貞元十二年進士調溧陽尉辟為興元參謀卒郊少隱嵩山性介寡合韓論其詩曰高處在古無上平處下顧二謝云張籍謚為貞曜先生集宋次道重編先時世傳汴吳鏤本五卷一百二十四篇周安惠本十卷三百三十一篇別本五

卷三百四十篇蜀人蹇濬用退之贈郊句纂成池集  
二卷一百八十篇自餘不爲編秩雜錄之家家自異  
次道揔拾遺逸摘去重複若體制不類者得五百十  
一篇而十聯句不與焉一贊二書附于後郊集於是  
始有完書

呂溫集十卷

右唐呂溫和叔也一字化光河中人貞元十四年進  
士以善韋執誼王叔文起家再命左拾遺同張薦使  
吐蕃元和初使還累進知御史雜事再貶道州刺史  
徙衡州溫從梁肅爲各章規摹左氏藻贍精富流輩



推尚劉禹錫爲編次其文序之云古之爲書先立言而後體物賈生之書道過秦而荀卿亦後其賦故斷自人文化成論至諸葛武侯廟記爲上篇今集先賦詩後雜文非禹錫本也

李翱集十八卷

右唐李翱習之涼武昭王之後貞元十四年進士調校書郎知制詔會昌初終山南東道節度使翱峭鯁論議無所屈仕不得顯官怫鬱無所發從韓愈爲文辭致渾厚見推當時集皆雜文無歌詩前有蘇舜欽序云唐之文章稱韓柳翱文雖辭不迨韓而理過於柳

張籍詩集五卷

右唐張籍文昌也和州人貞元十五年登進士第終國子司業籍性狷急惟長於樂府多警言句次有序元和中與白樂天孟東野歌辭天下宗之謂之元和體云集張洎編

文心雕龍

右晉劉勰撰評自古文章得失別其體製凡五十篇各係之以贊云余嘗題其後曰世之詞人刻意文藻讀書多滅裂杜牧之以龍星爲真龍王摩詰以去病爲衛青且見人譏之然亦不足恠蓋詩賦或率爾之作

故也今總著書垂世自謂嘗夢執丹漆器隨仲尼南  
行其自負不淺矣觀其論說篇籍稱論語以前經無  
論字六韜三論後人追題是殊不知書有論道經邦  
之言也其踈略殆過於王杜矣

昭德先生郡齋讀書志卷第四上

昭德先生郡齋讀書志卷第四中

別集類中

白居易長慶集七十一卷

右唐白居易樂天太原人貞元十七年進士中拔萃科元和初制策乙等調盩厔尉入翰林爲學士太和中遷刑部侍郎會昌初以刑部尚書致仕居易以文章精切然最工詩初頗以規諷得失及其多更下偶俗好當時士人爭傳鷄林賈國相率篇易一金在杭州自類詩藁分諷諭閑適感傷雜律四類前集五十卷有元稹序後集二十卷自爲序紀又有續後集五

卷今亡三卷矣予嘗謂樂天進退以義風流高矣與  
劉禹錫游人謂之劉白而不陷八司馬黨中與元稹  
遊人謂之元白而不蹈北司黨中又與楊虞卿爲姻  
家而不陷牛李黨中嗚呼叔世有如斯人髮髯者乎  
獨集後載聞李崖州貶二絕句其言淺俗似幸其禍  
敗者余固疑非樂天之語及以唐史攷之崖州貶時  
樂天沒將踰年或曰浮屠某作也

戴叔倫述藁十卷外詩一卷書狀一卷

右唐戴叔倫幼公也潤州人爲人溫雅善舉止貞元  
十六年進士累遷容管經畧使政治稱最 德宗賜

中和詩世以爲榮代還請爲道士未幾卒集有馮摠  
序或題會錄云唐史但云師事蕭穎士初稱其能詩  
時人少其詩骨氣絲弱故也

權德輿集五卷

右唐權德輿載之也秦州人未冠以文章稱諸儒間  
貞元十五年知制誥累官中書舍人元和五年以禮  
部尚書平章事德輿三歲知變四歲能賦詩積  
思經術無不貫綜自始學至老未曾一日去書其文  
雅正贍縟當時公卿功德卓異者皆所銘紀雖動止  
無外飾其醞藉風流自然可慕貞元元和間爲縉紳

羽儀其兩漢辨亡論世祖封不義侯議世多稱之云  
嘗自纂制集五十卷楊憑爲序今亡逸文集孫憲孫  
編次楊嗣復爲序

符載集十四卷

右唐符載字厚之岐襄人幼有宏達之志隱居廬山  
聚書萬卷不爲章句學貞元中李巽江西觀察薦其  
材授奉禮郎爲南昌軍副使繼辟西川韋臯掌書記  
澤潞郃士美參謀歷協律郎監察御史元和中卒段  
文昌爲墓誌附于後集皆雜文末篇有數詩而已集  
前有崔群送符處士歸序皆云載蜀人以比司馬王

揚云

張登集六卷

右唐張登性剛潔介特始以巾褐就辟歷衛佐廷尉  
平監察御史貞元中改河南士曹椽遷殿中侍御史  
漳州刺史居七年坐公累受劾吏議侵誣感疾卒權  
德輿爲之序甚詳以公幹景陽比之國史補亦稱登  
長於小賦氣宏而密間不容髮有織成隱起結綵蹙  
金之狀其舊集詩賦之外書啓序述誌記銘誄合一  
百二十二篇今存者纔六十餘首

戎昱集三卷



右唐戎昱撰李夔廉桂林月夜聞隣居吟咏之音清  
遲明訪之乃昱也即延爲幕賓後因飲席調其侍兒  
夔微知其故即贈之昱感怍賦詩有恩合死前酬之  
句又爲衛伯玉荆南從事後歷辰虔二州刺史

元稹長慶集六十卷

右唐元稹微之也河南人擢明經書判入等授校書  
郎元和初舉制科對策第一拜左拾遺在江陵與監  
軍崔潭峻善潭峻以稹歌詩奏御穆宗賞悅即以祠  
部郎中知制誥未幾入翰林爲中書舍人承旨學士  
長慶二年拜同中書門下平章事稹爲文長於詩與

白居易齊名號元和體往往播樂府穆宗在東宮  
妃嬪近習誦之宮中呼元才子及知制誥變詔書體  
務純厚明切盛傳一時有長慶集百卷今亡其四  
十卷

皇甫湜文六卷

右唐皇甫湜持正也睦州人元和元年進士仕至工  
部郎中裴度辟東都判官度修福先寺求碑文於白  
居易湜怒曰近舍湜而遠取居易請從此辭度謝之  
湜即酣飲援筆立就度贈車馬繒綵甚厚湜怒曰吾  
自爲顧况集序未嘗許人今碑字二千一字二縑何

遇我薄邪度笑曰不羈之才也從而酬之今集雜文三十八篇而已况集序在焉而碑已亡矣

李紳追昔遊三卷

右唐李紳公垂也亳州人元和元年進士補國子助教穆宗召爲翰林學士累進中書舍人武宗即位拜中書侍郎平章事紳爲人短小精悍於詩最有名號短李與李德裕元稹同時號三俊追昔遊者蓋賦詩紀其平生所遊歷謂起梁漢歸諫署升翰苑及播越荆楚逾嶺嶠止高安移九江過鍾陵守滁陽轉壽春留洛陽廉會稽分務東周守蜀鎮梁也開成戊午八

月自爲之序

鮑溶詩一卷

右唐鮑溶德源元和四年進士張爲謂溶詩氣力宏  
瞻博識清度雅正高古衆才無不備具云

朱倣詩一卷

倣字長通襄陽人隱居剡溪嗣曹王臯鎮江西辟節  
度參謀貞元初召爲拾遺不就

沈亞之集八卷

右唐沈亞之字下賢長安人元和十年進士涇原李  
彙辟掌書記爲祕書省正字長慶初補櫟陽尉四年

爲福建團練副使事徐晦後累進殿中丞御史內供奉大和三年栢耆宣慰德州取爲判官耆罷亞之貶南康尉後終郢州掾亞之以文詞得名狂躁貪冒輔耆爲惡故及於貶常遊韓愈門李賀杜牧李商隱俱有擬沈下賢詩亦當時名輩所稱云

姚合詩十卷

右唐姚合也崇曾孫以詩聞元和十一年李逢吉知舉進士歷武功主簿富平萬年尉寶應中監察殿中御史戶部員外郎出金杭二州刺史爲刑戶二部郎中諫議大夫給事中陝虢觀察使開成末終祕書監

世號姚武功云

施肩吾西山集五卷

右唐施肩吾吳興人元和十五年進士以洪州西山十二真君羽化之地慕其真風高蹈于此輯其所著自爲之序

李賀集四卷外集一卷

右唐李賀長吉也鄭王之孫七歲能辭章韓愈皇甫湜聞之過其家使賦詩援筆輒就自目曰高軒過二人大驚年二十七終協律郎賀辭尚奇詭爲詩未始先立題所得皆驚邁遠去筆墨畦徑當時無能效者

樂府十數篇雲韶工合之絃管云或說既卒後爲不相悅者盡取其所著投園中以故世傳者不多外集予得之梁子美

盧仝詩一卷

右唐盧仝范陽人隱少室山號玉川子徵諫議不起韓愈爲河南令愛其詩厚禮之嘗作月蝕詩以譏元和逆黨愈稱其工後死于甘露之禍

劉義詩一卷

右唐劉義也少嘗任俠殺人後更折節讀書善歌詩客韓愈門作冰柱雪車二詩出盧仝季賀右歸祿魯

不知所終今集二十餘篇尔不載二詩

斷金集一卷

右唐李逢吉令狐楚自未第至貴顯所唱和詩也後逢吉卒楚編次之得六十餘篇裴夷直名曰斷金集爲之序

杜牧樊川集二十卷外集一卷

右唐杜牧牧之也京兆人大和二年進士復舉制科會昌中以考功郎中知制誥終中書舍人牧善屬文剛直有奇節敢論引大事指陳利病爲詩情致豪邁人號小杜以別甫云臨死自爲墓誌悉楚所爲文章



其甥裴廷翰輯其藁編次爲之後序樊川蓋杜氏所居外集皆詩也

許渾丁卯集二卷

右唐許渾字仲晦園師之後大和六年進士爲當塗太平二令以病免起潤州司馬大中三年爲監察御史歷虞部員外睦郢二州刺史嘗分司於朱方丁卯潤自編所著因以名賀鑄本跋云按渾自序集三卷五百篇世傳本兩卷三百餘篇求訪二十年得沈氏曾氏本并取擬玄天竺集校正之共得四百五十四篇予近得渾集完本五百篇皆在然止兩卷唐藝文

志亦言渾集兩卷鑄稱三卷者誤也

雍陶詩五卷

右唐雍陶國鈞大和八年進士大中六年自國子毛詩博士出刺簡州唐志集十卷今亡其半

李商隱樊南甲集二十卷乙集二十卷又文集八卷

右唐李商隱義山也隴西人開成二年進士令狐楚奏爲集賢校理楚出汴滑興元皆表幕府補大學博士初爲文瑰邁奇古及從楚學儷偶長短而繁縟過之旨能感人人謂其橫絕前後無儔者今樊南甲乙

集皆四六爲序即所謂繁縟者又有古賦及文共二卷辭旨恠詭宋景文序傳中云譎恠則李商隱蓋以此詩五卷清新纖艷故舊史稱其與溫庭筠段成式齊名時號三十六體云

李德裕會昌一品集二十卷姑臧集五卷平

泉詩一卷窮愁志三卷別集八卷別友賦一卷

右唐李德裕文饒也趙郡人宰相吉甫之子少力于學旣冠卓犖有大節不喜與諸生試有司憲宗時以廕補校書郎穆宗初擢翰林學士號令大典皆出于手進中書舍人召兵部尚書中書門下平章事

會昌初復秉政平澤潞筮不功拜太尉封衛公大中貶崖州司戶叅軍三年卒德裕性孤峭明辨有風采善爲文章雖在大位手不去書謀議援古衮衮可喜爲武宗知常以經綸天下爲已任時王室幾中興爲一品集鄭亞爲之序皆會昌制誥表狀外內冊贊碑序文也賦詩四首窮愁志乃崖州所撰姑臧集題段全緯纂上四卷亦制誥第五乃憂黜斯朝貢傳與八詩別集乃哀合古賦平泉詩集外雜著又有古賦一卷載金松等四賦

劉得仁詩集一秩一卷

右唐劉得仁公主之子長慶中以詩名五言清瑩獨步文場自開成後昆弟皆居顯仕獨自苦於詩舉進士二十年竟無所成嘗有寄所知詩云外族帝王足中朝親故稀翻令浮議者不許九霄飛及卒詩僧棲白以絕句弔之曰忍苦爲詩身到此冰魂雪魄已難招直教桂子落墳上生得一枝冤始銷

劉綺莊歌詩四卷

右唐四庫書目有綺莊集十卷今所餘止四卷詩三十二啓狀四十四而已惜其散落太半其本乃南唐故物紙墨甚精後題曰昇平四年重題印其文云云

薛逢歌詩二卷

右故唐薛逢陶臣也河東人會昌元年進士終祕書  
監逢持論鯁切以謀略高自標顯與楊收王鐸同年  
登第而逢文藝最優收作相逢有詩云誰知金印朝  
天客同是沙堤避路人鐸作相逢又有詩云昨日鴻  
毛萬鈞重今朝山岳一毫輕二人皆怒故不見薩

鄭畋集五卷

右唐鄭畋台文也滎陽人會昌二年進士書判入等  
授校書郎調渭南尉知制誥中書舍人乾符四年以  
本官同中書門下平章事二年召復秉政至成都以

病不拜終太子少保藁草皆乾符堂判勅語云

趙嘏渭南詩三卷

右唐趙嘏承祐也會昌四年進士終渭南尉杜紫微讀其早秋詩云殘星幾點鴈橫塞長笛一聲人倚樓因謂之趙倚樓云

孟遲詩一卷

右唐孟遲字叔之平昌人會昌五年陳商下及第

薛能集十卷

右唐薛能字大拙汾州人會昌六年登進士第大中末書判中選補盩厔尉辟太原陝虢河陽從事李福

鎮滑表置觀察判官歷御史都官刑部員外郎福徙  
西蜀奏以自副咸通中攝嘉州刺史造朝遷主客度  
支刑部郎中俄刺同州京兆尹溫漳貶命權知尹事  
出帥咸化入授工部尚書復節度徐州徙忠武廣明  
元年徐軍戍澗水經許能以軍懷舊惠館之城中許  
軍懼見襲大將周岌乘衆疑怒逐能據城自稱留後  
因屠其家能政嚴察絕私謁癖於詩日賦一章晚節  
惑浮屠法奉之唯謹然資鷺倨故佻輕以忤物及爲  
藩鎮尤易武吏嘗命其子屬橐鞬雅拜雜進士或問  
其故曰渠銷弭灾咎云



李郢端公詩一卷

右唐李郢楚望也大中十年進士詩調清麗居餘杭  
踈於馳競爲藩鎮從事兼侍御史

鄭嵎津陽門詩一卷

右唐鄭嵎字賓光大中五年進士津陽即華清宮之  
外闕爲詩百韻紀明皇時事自有序云

劉滄詩一卷

右唐劉滄字溫靈大中八年進士詩頗清麗句法絕  
類趙嘏

孫樵經緯集三卷

右唐孫樵字隱之大中九年進士廣明初狂寇犯闕  
赴岐隴授職方員外郎時詔書曰行在三絕以常侍  
李騫有曾閔之行前進士司空圖有巢由之風樵有  
楊馬之文遂輯所著名經緯集

李群玉詩一卷

右唐李群玉文山也澧州人曠逸不樂仕進專以吟  
詠自適詩筆妍麗才力遒健好吹笙美筆翰親友彊  
赴舉上一而止裴休廉察湖南延郡中大中八年來  
京師進詩三百篇休復論薦授弘文館校書郎集後  
附其進詩表并除官制廣記所載黃陵廟事甚異

絕句在焉

張祜詩一卷

右唐張祜承吉清河人樂高尚客淮南杜牧爲度支使善其詩嘗贈之詩曰何人得似張公子千首詩輕萬戶侯嘗作淮詩有人生只合揚州死禪智山光好墓田之句大中中果終丹陽隱舍人以爲讖

陳陶集二卷

右唐陳陶嵩伯也鄱陽人大中時隱洪州西山自號三教布衣云江南野史有傳

溫庭鈞金筌集七卷外集一卷

右唐溫庭筠也庭筠本名岐字飛卿宰相彥博之裔詩賦清麗與李商隱齊名時號溫李能逐弦吹之音爲側艷之辭爲行塵雜由是累年不第終國子助教宣宗嘗作詩賜宮人句有金步搖遣場中對之庭筠對以玉跳脫上喜其敏欲用之而嘗作詩忤時相令狐綯終棄不用

皮日休文藪十卷

右唐皮日休字襲美一字逸少襄陽人隱鹿門山自號醉吟先生以文章自負尤善箴銘咸通八年登進士第爲著作佐郎太常博士乾符喪亂東出關爲毗

陵副使陷巢賊中賊遣爲讖文疑其譏已遂害之集乃咸通丙戌年居州里所編自序云發篋次類文藁繁如藪澤因以名之凡二百篇

司空圖一鳴集三十卷

右唐司空圖表聖也河中人咸通十一年王凝下及第黃巢陷長安僖宗次鳳翔召拜知制誥中書舍人朱溫將篡召爲禮部尚書不赴聞哀帝遇弒不食而卒圖居中條山自號知非子柰辱居士集自爲序以濯纓亭一鳴牕名其集子荷別爲集後記最長於詩其論詩有曰梅止於酸而鹽止於鹹其美常在酸鹹

之外謂其詩碁聲花院靜  
幡影石壇高之句爲得之  
人以其言爲然

唐彥謙鹿門詩一卷

右唐唐彥謙茂業也并州人咸通末舉進士第中和  
王重榮表河中從事歷節度副使晉絳二州刺史重  
榮遇害貶漢中掾興元楊守亮留署判官遷副使閬  
壁刺史卒彥謙才高負氣無所摧屈博學多藝充能  
言詩師庭筠故格體類之世稱耳聞明主提三尺眼  
見愚民盜一杯蓋彥謙句也自號鹿門先生有薛廷  
珪序

曹唐詩一卷

右唐曹唐字堯賓桂州人初爲道士咸通中爲府從事卒作游仙詩百餘篇或斬之曰堯賓嘗作鬼詩唐曰何也井底有天春寂寂人間無路月茫茫非鬼而何唐乃大哂今集中不見然他詩及神仙者尚多

秦韜玉投知小錄三卷

右唐秦韜玉中明京兆人有詞藻工歌吟險而好進爲田令孜所善僖宗幸蜀令孜引爲工部侍郎中和二年賜進士第編入春榜

雲臺編三卷宜陽縣編一卷

右唐鄭谷字守愚宜陽人光啓三年擢高第遷右拾遺歷都官郎中乾寧四年歸宜春卒于別墅其集號雲臺編者以其邕從華山觀居所編次云谷詩屬思頗切於理而格韻凡猥語句浮俚不爲議者所多然一時傳諷號鄭都官而弗名也

陸龜蒙笠澤叢書四卷

右唐陸龜蒙魯望也蘇州人少高放通六經大義尤明春秋舉進士一不中從張搏爲蘇湖從事居松江甫里以文章自怡自號江湖散人或號天隨子甫里先生笠澤者松江地名也其自序云自乾符六年春



卧病笠澤遇體中不甚羸耗時亦隱几著書詩賦銘  
記往往雜發不類不次混而錄之故曰叢書

韓偓詩二卷香奩集

右唐韓偓致光也京兆人龍紀元年進士累遷諫議  
大夫翰林學士昭宗幸鳳翔進兵部侍郎承旨朱全  
忠怒貶濮州司馬榮懿尉天祐初挈族依王審知而  
卒香奩集或曰和凝旣貴惡其側艷故詭稱偓著云

李洞詩一卷

右唐李洞撰字才江諸王之孫慕賈島爲詩銅鑄其  
像事之如神詩人多誚僻澁不貴其竒峭唯吳融稱

之昭宗時不第遊蜀卒

杜荀鶴唐風集十卷

右唐杜荀鶴池州人大順二年進士善爲詞句切理  
宣州田頔重之嘗以牋問至梁祖薦爲翰林學士主  
客員外恃勢侮易縉紳衆怒欲殺之而未及天祐初  
病卒有顧雲序荀鶴自號九華山人

程晏集六卷

右唐程晏然乾寧二年進士集皆雜文

孫郃文纂一卷

右唐孫郃字希韓四明人乾寧四年進士好荀揚孟

之書慕韓愈爲校書郎河南府文學舊四十卷

朱朴致理書一卷

右唐宋朴襄陽人以三史舉爲荆門令乾寧中方士許巖士得幸禁中言朴有經濟才帝幸石門召對卽拜諫議大夫平章事

曹松詩一卷

右唐曹松夢徵也舒州人學賈島爲詩天復元年與王希羽劉象柯崇鄭希顏同登第年皆七十餘號五老榜時以新平內難聞放進士喜特勅授校書郎而卒

裴說詩一卷

右唐裴說撰天祐三年進士詩有避亂一身多之句  
讀者悲之

羅虬比紅兒詩一卷

右唐羅虬也 皇朝方性夫注虬詞藻富贍與其族  
人隱鄴齊名時號三羅從鄜州李孝恭籍中有杜紅  
兒者善歌常爲副戎屬意副戎聘隣道虬請紅兒歌  
贈綵孝恭不令受之虬怒拂衣而起詰旦手刃之旣  
而追其寃作絕句詩首篇借古人以比其艷盛行於時

方干詩集一卷

右唐方干字雄飛歙人唐末舉進士不第隱鏡湖上

徐凝有詩一見于器之授以詩律其兒陋又免缺而喜凌侮嘗謁廉帥誤三拜人號方三拜將薦于朝而卒門人謚玄英先生其生楊弁與郃編次王贊爲序郃又爲玄英先生傳附

王德輿詩一卷

右唐王德輿集有次韻和鄭畋詩知其懿僖間人也

沈彬集一卷

右唐沈彬保大中以尚書郎致仕居高安集中有與韋莊杜光庭貫休詩唐末三人皆在蜀疑其同時避亂嘗入蜀云上李昇山水圖詩在焉

能皦屠龍集五卷

右晉能皦後唐清泰二年進士爲延安劉景巖從事  
天福中說景巖歸朝擢右司諫坐累黜上津今集有  
陶穀序陳沆賞皦早梅云一夜欲開盡百花猶未知  
曰太妃容德於是乎在

沈顏整書十卷

右僞吳沈顏字可鑄傅師之孫天復初進士爲校書  
郎屬亂離奔湖南辟巡官吳周建爲淮南巡官禮儀  
使兵部郎中知制誥翰林學士順義中卒顏少有詞  
藻琴碁皆臻妙場中語曰下水缸言爲文敏速無不

載也性閑談不樂世利嘗病當時文章浮靡倣古著書百篇取元次山贅叟之說附已志而名書其自序云自孟軻以後千餘年經百千儒者咸未有聞焉天厭其極付在鄙子其夸誕如此

李煜集十卷

右僞唐主李煜重光也景之子少聰悟喜讀書屬文工書畫知音律建龍三年嗣僞位開寶八年王師克金陵封違命侯太平興國三年終隴西郡公贈吳王江隣幾雜志云

韓熙載格言五卷

右僞唐韓熙載字叔言北海人後唐同光中進士南  
奔江淮李昇建國用爲祕書郎使與其子璟游璟嗣  
位爲虞部員外郎史館修撰兼太常博士知制誥頃  
之請誅陳覺黜和州司馬復召中書舍人累遷兵部  
尚書第宅華侈妓樂四十餘人不加檢束時人比徐  
之才璟屢欲倚以爲相用是不果後左授右庶子分  
司乃盡斥群妓單車引道留爲祕書監俄復位已而  
其去妓皆還上書論古今之變名格言熙載天才俊  
敏工隸書及畫聲名冠一時自朱元叛後煜頗疑北  
人多因事誅之熙載愈益淫縱然喜延譽後進如舒



雅等後多知名謚曰文

潘佑滎陽集十卷

右僞唐潘佑金陵人韓熙載薦於璟授秘書正字直  
崇文館煜時爲虞部員外郎史館修撰知制誥中書  
舍人佑性貞介文章贍逸尤長論議坐言事悖慢下  
獄自剄死人頗言張洎譖之

李有中詩二卷

右僞唐李有中嘗爲新塗令與水部郎中孟賓于稱  
其詩如方干賈島之徒宥于晉天福中進士也有中  
集中有贈韓張徐三舍人詩韓乃熙載張乃洎徐乃

鉉也春日詩云乾坤一夕兩草木萬方春頗佳他皆稱是

成彥雄梅頂集

右僞唐成彥雄江南進士有徐鉉序

張蠙詩一卷

右僞蜀張蠙字象文清河人唐乾寧中進士爲校書郎櫟陽尉犀浦令建開國拜膳部員外郎後爲金堂令王衍與徐后遊大慈寺見壁間塙頭細雨垂纖草水面回風聚落花愛之間之云蠙句給禮令以詩進蠙以二首獻衍頗重之將召爲制誥宋光嗣以其輕

傲止賜白金而已蟻生而穎秀幼能爲詩作登臺  
臺有白日地中出黃河天外來之句爲世所稱

牛嶠歌詩三卷

右僞蜀牛嶠字延峰隴西人唐相僧孺之後博學有  
文以歌詩著名乾符五年進士歷拾遺補闕尚書郎  
建鎮西川辟判官及開國拜給事中卒集本三十卷  
自序云竊慕李長吉所爲歌詩輒效之

韋莊浣花集五卷

右僞蜀韋莊字端已仕王建至吏部侍郎平章事集  
乃其第藹所編以所居即杜甫草堂舊址故名云僞

史稱莊有集二十卷今止存此

盧延讓詩一卷

右偽蜀盧延讓子善也范陽人唐光化元年進士卽  
陵雷滿辟滿敗歸建及僭號授水部員外郎累遷給  
事中卒官終刑部侍郎延讓師薛能詩不尚竒巧吳  
融以其不蹈襲大竒之

羅隱甲乙集十卷讒書五卷

右杭越羅隱字昭諫餘杭人唐乾符中舉進士不第  
從事諸鎮皆無合久之而歸鏐辟掌書記歷節度判  
官副使奏授司勳郎中梁祖以諫議大夫召召不行魏

博羅紹威推爲叔父表薦給事中卒隱少聰敏作詩著文以譏刺爲主自號江東生其集皆自爲序

孫光憲鞏湖編玩三卷

右荆南孫光憲字孟文陵州人王衍降唐避地荆南從誨辟掌書記歷檢校祕書監御史大夫王師收朗州光憲勸其主獻三州乾德中終黃州刺史自號葆光子

徐鉉集三十卷

右僞唐徐鉉字鼎臣廣陵人仕楊溥爲祕書郎直宣徽北院長文翰李昇時知制誥璟煜時累官爲翰林學士歸朝爲直學士院給事中散騎常侍溥化初坐

累黜靜難軍司馬鉉初至京師見御毛褐者輒哂之  
邠苦寒竟以冷氣入腹而卒鉉幼能屬文尤精小學  
爲文未嘗沈思自云速則意思壯緩則體勢踈慢云  
集有陳彭年序

李涉歌詩一卷

右唐李涉也早從陳許辟一再謫官夷陵大和中爲  
大學博士自號清溪子弟渤三詩附

賈島長江集十卷

右唐賈島浪仙也燕薊人累舉進士不第文宗時坐  
飛謗謫長江主簿會昌初終普州司倉參軍島少爲

僧名無本後從韓愈遂去浮屠

于武陵詩一卷

右唐于武陵大中進士

皎然杼山集十卷

右唐僧皎然撰字晝吳興人謝靈運十世孫工篇什  
德宗詔錄本納集賢院集前有于頔序并贈晝上人詩

貫休禪月集三十卷

右唐僧貫休撰字德隱姓姜氏婺州人後入蜀號禪  
月大師初吳融爲之序其弟子曇域削去別爲序引  
僞蜀乾德中獻之

清塞詩一卷

右唐僧清塞字南卿詩格清雅與賈島無可齊名寶曆中姚合爲杭州因携書投謁合聞其哭僧詩云凍湏  
亡夜剃遺偈病中書大愛之因加以冠巾爲周賀云  
虛中碧雲詩一卷

右唐僧虛中也居玉笥山嘗以詩投司空圖酬云十  
年太華無知己只得虛中一首詩其見重如此

薛濤錦江集五卷

右唐薛濤洪度也西川樂妓工爲詩當時人多與酬  
贈武元衡奏校書郎大和中卒李肇云樂妓而工詩



者濤亦文妖也

修文要訣三卷

右僞川馮鑑撰雜論爲文體式評其誤謬以訓初學云  
別集類下

柳仲塗集一卷

右皇朝柳開字仲塗大名人開寶六年進士太平興  
國中上書願備邊用擢崇儀使知寧邊軍徙全桂二  
年貶復州團練副使居久之復官歷環邠曹代忻滄  
五州咸平四年終于京師開幼竒警言有膽氣學必宗  
經慕韓愈柳宗元爲文因名有愈字紹先旣而易今

名字自以爲開聖道之塗也集乃門人張景所編歐  
公常推 本朝古文自仲塗始

胡周父文集十卷

右皇朝胡旦字周父渤海人太平興國三年進士第  
一人知海州上河平頌先是盧多遜趙普罷頌有逆  
遜投遠姦普屏外之句 太宗怒貶商州團練副使  
上平燕八議召復官再遷知制誥翟馬周上封事斥  
時政語連旦謫坊州團練副使復召知制誥草王繼  
恩制詞溢美流潯州景德初以目病致仕終祕書監  
爲人雋辯強敏少有大志力學以瞻博聞雍熙淳化

間奏御之文爲時推賞晚節黷貨多干擾州縣持吏短長時論薄之

寇忠愍詩三卷

右皇朝寇準字平叔華州人太平興國中登進士科淳化五年參知政事切直上怒起輒挽衣留以俟虜決定策立 眞宗爲皇太子景德元年拜平章事契丹入寇決親征之策三年出知陝州大中祥符七年同平章事明年罷天禧三年復相 眞宗不豫皇后預政準白上請太子監國因令楊億草制且進億以代丁謂詰朝準被酒漏言累貶雷州司戶徙衡州司

馬卒後詔許歸葬公安縣民擁道設祭立竹林焚紙竹  
無根株踰月皆自生民即其地立祠名其竹曰寇公  
竹 仁宗時贈中書令謚忠愍嘗封萊國公初篤學  
喜屬文尤長詩什多得警句在相位論議忠直不顧  
身謀仇邪媒孽旣以謫死或又謗之云在相位時與  
張齊賢相傾朱能謂天書降乾祐準知而不言曾鞏  
明其不然曰準審如是丁謂拂湏固足以悅之集有  
范雍叙共二百四十首野水無人渡及江南春二首  
皆在獨到海只十里之詩已云其全篇矣

王元之小畜集三十卷

右皇朝王禹偁字元之鉅野人家微賤九歲能爲歌  
詩畢士安見而異之及長善屬文太平興國八年登  
進士第端拱初試文擢左司諫知制誥判大理寺辨  
徐鉉罪忤旨貶商州團練副使久之復召知制誥入  
翰林爲學士 孝章皇后崩梓宮遷主第禹偁謂后  
嘗母儀天下當用舊典坐謗訕出知商州徙揚州  
真宗即位復召掌誥修 太宗實錄坐語涉輕誣出  
黃州元之詞學敏贍獨步一時鋒銳氣厲極談世事  
臧否人物以直道自任故屢被擯斥喜稱獎後進當  
世名士多出於門下集自有序

宋文安集一百卷

右皇朝宋白字素臣開封人年十二善屬文建隆二年進士調嘉州王津令太宗平晉獻頌上嘉之累擢翰林學士卒謚文安白之文頗浮麗而理致或不工典貢舉取王禹偁田錫胡旦時稱得人

晁文元道院別集十五卷法藏碎金錄二十卷

右五世祖文元公也諱某字明遠澶州人自父始徙家彭門幼從王禹偁學太平興國五年進士至道末擢右正言直史館知制誥入翰林爲學士加承旨眷禮優厚天禧中析解近職判西京留司御史臺居六

年請老以太子少保致仕終少傅年八十四文元謚也國史云公樂易淳固守道甚篤雖貴勢無所摧屈嘗言歷官臨事未嘗挾情害人以售進保全護固如免髮膚之傷真宗數稱其長者楊億謂其所作書命代言之體李獻臣亦言公服膺墳典耆年不倦少遇異人指導心要不喜術數之說疑文滯義須質正後已文章典贍書法指正時輩推重自唐以來世掌告命者唯楊於陵及其子而晁氏繼之延譽後進其門人如宋宣獻晏元憲李邯鄲皆爲世顯人集皆有自序及李遵勗後序

楊文公刀筆集十卷

右皇朝楊億字大年建州人祖文逸嘗夢一羽人自稱懷玉山人覺而億生白毛被體其長盈尺踰月始墮雍熙初以才名聞年纔十一召至闕下得對面試詩賦授秘書省正字宰臣等賀得神童淳化中奏二京賦命試禁林賜進士第久之直集賢院修永熙實錄獨成五十六卷 眞宗即位累擢知制誥入翰林爲學士祥符中母病楊翟謁告不得報歸省俄自以病丐解官以太常少卿分司病愈起知汝州復爲學士卒年四十七天性穎悟自幼迄老不離翰墨爲文



敏速對客談笑揮毫無滯悖聞強記於歷代典章制度尤所該通時多取正樂道人善後進翕然宗之然評品人物黑白太明姦邪疾惡之故屢被讒毀 眞宗愛其材特保持之僅免焉景祐中王晦叔上其爲寇相請 皇太后親政疏草 仁宗嘉歎特贈禮部尚書謚曰文刀筆集有陳詒序凡三百六十三首

張乖崖集十卷

右皇朝張詠字復之濮州人太平興國初進士累擢至樞密直學士御史中丞禮部尚書卒年七十少好擊劔兼通術數爲文尚氣不事彫飾自號乖崖公知

益州恩威並著至今人畏愛之錢易所撰墓誌李旼所纂語錄附于後

陳文惠忠立集二卷潮陽編一卷

右皇朝陳堯佐字希元閩州人端拱初進士累遷三司副使修永定實錄擢知制誥歷韶廬壽洛并同雍鄭八州景祐四年召拜同中書門下平章事後太子太師致仕年八十二卒號知餘子謚文惠堯佐屬辭尚古不牽世用喜爲二韻詩辭調清警號雋味集皆自有序

孫漢公集三十卷

右皇朝孫何字漢公蔡州人淳化三年應進士殿省  
俱中第一四遷起居舍人知制誥性卞急嘗任京西  
東兩浙轉運使副頗事苛察幼篤學嗜古爲文宗經  
與丁謂同爲王元之所稱時謂之孫丁集有丁謂序

丁晉公集四卷

右皇朝丁謂字公言初字謂之蘇州人淳化三年進  
士累遷知制誥出知鄆亳昇三州天禧四年拜平章  
事俄以戶部罷未幾復相封晉國公乾興中坐擅改  
永定陵貶崖州司戶更赦徙道州明道末以秘書監  
召還卒於光州幼聰敏書經目輒記不忘善爲古文

章尤工詩什儉巧險詖世<sub>以</sub>其儔大中祥符初議封  
禪未決謂因言大計有餘議遂定當時所奏祥瑞事  
皆謂及王欽若預焉喜圖畫博奕音律吳人自陸宣  
公後至謂始相 本朝熙寧以前議者莫不指謂爲  
姦邪之首自王安石用事頗稱其賢智云集皆詩也

劉中山刀筆三卷淝川集四卷

右皇朝劉筠字子儀大名入咸平元年進士三遷右  
正言直史館以司諫知制誥出知鄧陳兩州召入翰  
林爲學士嘗草<sub>于</sub>謂李迪罷相制既而又命草制復  
留<sub>于</sub>謂筠不奉詔遂出知廬州再召爲學士月餘以

病知穎州召入翰林加承旨未幾進戶部龍圖閣學士再知廬州爲人不苟合學問閎博文章以理爲宗辭尚緻密尤工篇詠能侔揣情狀音調淒麗自景德已來與楊億以文章齊名號爲楊劉天下宗之刀筆集并淝川集黃鑑序

鮮于伯圭集一卷

右皇朝鮮于瓌字伯圭閬中人文章爲一時之冠累舉不第嘗作摠愁詞時人稱之李宗諤贈詩云漢殿無人薦揚子滿朝空誦摠愁詞後與宗諤同年第四人登科趙普判秦州辟爲觀察推官卒

晏元憲臨川集三十卷紫微集一卷

右皇朝晏殊字同叔臨川人景德三年張知白薦得  
召賜同進士出身再試文擢秘書正字爲昇王府記  
室累擢知制誥翰林學士寶元三年拜平章事坐撰  
李宸妃墓銘不言上宸妃所出及役兵治產事四年  
罷知穎川歷陳許雍洛以疾歸侍經席卒性剛峻幼  
孤獨學爲文溫純應用尤長於詩杼情寓物辭多曠  
達當世賢士如范文正歐陽文忠皆出其門女適富  
鄭公楊察世稱其知人云集有兩本一本自作序

范文正丹陽編八卷

右皇朝范仲淹字希文其先邠人大中祥符八年進士幼隨母適朱氏名悅後復今姓名擢右司諫爭廢鄆后事出守睦蘇二州以召充天章閣待制知開封獻百官圖詆宰相奪職知饒州歷潤越寶元初知求興陝西經略副使涇原帥敗例降官知耀州幾月改環慶遷四路經略招討使慶曆元年召拜樞密副使參知政事明年宣撫河東陝西俄知邠州病請南陽徙杭青二州卒謚文正爲學明經術跂慕古人事業慨然有康濟之志作文章尤以傳道爲任事母至孝姑蘇之范皆踈屬置義莊以賙給之天下想聞其風

采賢士大夫以不獲登其門爲恥獨梅堯臣嘗著碧雲霞一編以譏詆之云集有蘇子瞻叙

种明逸詩六卷

右皇朝种放字明逸長安人隱終南之豹林谷咸平中遣使召赴闕授左司諫累遷諫議大夫給事中祥符八年終工部侍郎放通經史七歲能屬文不喜釋氏常裂佛書以製帷帳著嗣禹說在朝有所啓奏時無知者楊億譏其循默真宗乃出其議十三篇以示輔臣晚年頗縱酒盛翼服王嗣宗知京兆嘗條上其不法詔問狀不娶無子集乃姪孫說所編范巽之



爲序卷首載 眞宗詔書及御製詩十首

魏仲先草堂集一卷 鉅鹿東觀集二卷

右皇朝魏野字仲先陝州人志清逸以吟詠自娛亡  
懷榮利隱于陝之東郊手植竹木繞以流泉鑿土袤  
丈曰樂天洞前立草堂爲詩清苦句多磴策與寇準  
王旦善每往來酬唱祀汾陰歲召不起卒贈著作郎  
集有薛田序

潘道遙詩二卷

右皇朝潘閻字道遙大名人通易春秋以詩知名  
太宗嘗召對賜進士第將官使之不就王繼恩與之

善繼恩下獄捕閻甚急父之弗得咸平初來京師尹  
收繫之 真宗釋其罪以爲滁州參軍後卒于泗上  
與王禹偁孫何柳開魏野交好最密集有祖無擇序  
錢易張逵皆碣其墓附于集蘇子瞻少年時過一山  
院見壁上有詩曰夜涼知有兩院靜若無僧而不知  
何人詩今集載此聯乃閻夏日宿西禪院詩也小說  
中謂閻坐盧多遜黨嘗追捕非也

昭德先生郡齋讀書志卷第四中

昭德先生郡齋讀書志卷第四下

別集類下下

李復古集一卷

右皇朝李迪復古濮州人少從柳開學爲古文開嘗謂其門人張景高弁曰此公輔器也景祐初應進士擢居第一累遷翰林學士拜同中書門下平章事後致仕謚文定

孫文懿集三十卷

右皇朝孫抃字夢得眉山人六世祖長孺喜藏書貯以樓蜀人號書樓孫天聖中進士甲科累遷知制誥

翰林學士承旨後參知政事謚文懿

夏文莊集一百卷

右皇朝夏竦子高江州德安人以死事補官舉賢良除光祿丞累擢知制誥仁宗屢欲相之爲言者所攻而寢初封英國公後改封鄭謚文莊貴顯凡四十年天資好學自經史百氏陰陽律曆之書無所不通善爲文章尤長偶儷之語朝廷大典策屢以屬之爲詩巧麗皆山勢蜂腰斷谿流燕尾分之類其集夏伯孫編次有宋次道序

宋景文集一百五十卷

右皇朝宋祁子京開封雍丘人天聖中與其兄郊同舉進士奏名第一章獻以爲弟不可先兄乃擢郊第一而以祁爲第十當是時兄弟俱以辭賦妙天下號大小宋累遷知制誥除翰林學士承旨以文章擅名一時終不至大用衆頗惜之張方平爲之請謚景文通小學故其文多竒字蘇子瞻嘗謂其淵源皆有可考竒嶮或難句以爲知言集有出麾小集西州猥藁之類合而爲一

田公金巖集兩卷

右皇朝田况字元均嘗登學究進士賢良科終尚書

左丞嘗知成都聽斷之明蜀人以比張乖崖

林君復集二卷

右皇朝林逋字君復杭州錢塘人少刻志爲學結廬  
隱西湖之孤山 真宗聞其名詔郡縣常存遇之善  
行書喜爲詩其語孤峭澄淡臨終作一絕句云茂陵  
他日求遺藁猶喜初無封禪書或刻石置之其墓中  
賜謚曰和靖先生集有梅聖俞序

陳亞之集一卷

右皇朝陳亞之字亞之性滑稽喜賦樂名詩仕至司  
封郎中藥詩者始於唐人張籍有江沔平歲暮相逢地

黃葉霜前半下枝之詩人謂起於亞之實不然也

何聖從廬江文集二十卷刀筆五卷奏議二十卷

右何郟字聖從成都人 仁廟朝爲御史諫官擢天章閣待制熙寧中以尚書右丞致仕歷漢梓永興河南四帥守天資好學殆廢寢食爲詩章簡重淳淡有孟東野之風其仕臺諫時知無不言頗有直聲鮮于子駿嘗誌其墓集有李邦直序

富文忠劄子集六卷奏議十二卷

右皇朝富弼彥國河南人天聖八年中制科至和二



年召拜同中書門下平章事元豐中卒年八十謚文忠其爲文章辨而不華質而不俚晁以道爲之序其略曰人孰不仰公使虜之功上乃拜樞密副使而公力辭至和之末請立皇嗣之功人或未聞公於褒進司徒則一命而不避公每聞人語及北事便變色若不欲聞者至青州救災之功平居喜爲人道之石介嘗以夔契方公矣而嚴事主沂公薦士後至將相者多矣而最善劉旣柔數事皆世所罕知者又曰公於仁宗時言猶雨露英宗時言猶海潮也神宗時言猶鳳鳴也

歐陽文忠公集八十卷諫垣集八卷

右皇朝歐陽脩字永叔吉州人舉進士累遷知制誥  
夏竦以求叔黨於杜韓范富因以外生張氏事汚之  
下開封府治之無狀坐用張氏奩中物市田出知滁  
州召入修唐書爲翰林學士未幾參知政事蔣之奇  
言其帷箔事連其長子婦吳氏詔詰之奇辭窮坐貶  
年六十乞致仕卒謚文忠博極群書好學不倦尤於  
獎進天下士爲己任延譽慰藉極其力而後已於經  
術治其大指不求異於諸儒與尹洙皆爲古學遂爲  
天下宗匠蘇明允以其文詞令雍容似李翱切近適

當似陸贄而其才亦似過此兩人至所作唐書五代史不愧班固劉向也獨議濮邸事議者不以爲是有蘇子瞻序

劉公是集七十五卷

右皇朝劉敞字原甫袁州人慶曆中舉進士廷試第一累遷知制誥出知永興感官效得驚眩疾力求便郡仁宗謂執政曰如敞者豈易得邪賜以新橙五十爲人明白俊偉自六經百氏下至傳記無所不通爲文章尤敏贍好摹倣古語句度在西掖時嘗食頃揮九制各得其體英宗嘗語及原甫韓魏公對以

有文學歐公曰其文章未佳特博學可稱耳

尹師魯集二十卷

右皇朝尹洙字師魯河南人天聖中進士以薦爲館閣校勘累遷右司諫知渭州兼領涇原路經略公事爭城永洛事爲董士廉所訟遣御史就鞫不能得其罪猶貶均州監酒師魯內剛而外和與人言必極辨其是非前世治亂沿革之變靡不該貫人有疑不能通爲指畫講說皆釋然自得尤長於春秋文章自唐末卑弱本朝柳開始爲古學天聖初與穆修大振起之

梅聖俞宛陵集六十卷

右皇朝梅堯臣聖俞宛陵人少以蔭補吏累舉進士  
輒抑於有司幼習於詩出語以驚其長者既長學六  
經仁義之說其爲文章簡古純粹然最樂爲詩王舉  
正見而歎曰二百年無此作矣歐陽永叔與之友善  
其意如韓愈之待郊島云

孫明復睢陽小集七卷

右皇朝孫明復晉州人居泰山深於春秋自石介已  
下皆師事之年四十未娶李丞相迪以其弟之子妻  
之慶曆中范文正富鄭公言之于朝除國子監直講

嘗對邇英閣說詩上欲以爲侍講楊安國沮之而寢  
石守道集二十卷

右皇朝石介守道兗州奉符人天聖八年登進士第  
遷直集賢院篤學大志嘗謂時無不可爲不在其位  
則行其言雖獲禍至死而不悔其爲文章陳古今治  
亂成敗以指切當世無所忌諱作慶曆聖德詩分別  
邪正專斥夏竦其後守道死竦因誣以北走契丹請  
剖棺驗視云

石曼卿一卷

右皇朝石延年曼卿南京宋城人舉進士不中爲三

班奉職改太常寺太祝遷祕閣校理能爲詩書甚適麗  
蘇才翁集一卷

右皇朝蘇舜元才翁子美兄也工草隸詩豪麗

蘇子美集十六卷

右皇朝蘇舜欽子美易簡之孫也景祐中進士累遷  
集賢校理監進奏院坐用故紙錢會客除名慷慨有  
大志好古文章及廢居蘇州買水石作滄浪亭益讀  
書發其憤滿於歌詩其體豪放往往驚人又善草書  
酣醉落筆爭爲人所傳翫集歐公爲之序

鄭毅夫卽谿集五十卷

右皇朝鄭獬字毅夫安州人少俊異爲詩賦有聲廷  
試第一累遷知制誥入翰林爲學士王安石不悅之  
乘宰相在告除獬知杭州爲文有豪氣峭整無長語  
與滕達道少相善嗜酒落魄無檢操人目之曰滕屠  
鄭沽云

蘇明允嘉祐集十五卷

右皇朝蘇洵字明允眉山人至和中歐陽永叔得明  
允書二十二篇大愛其文辭以爲雖賈誼劉向不過  
也以書獻除校書郎與姚子張同編太常因革禮百  
卷書方成而卒治平史臣謂永叔所獻明允之文甚



美然大抵兵謀權利機變之言也

蔡君謨集十七卷

右皇朝蔡襄字君謨興化人天聖中舉進士慶曆三年知諫院 仁宗慨然思治增置諫官四員君謨在選中皇祐中知制誥累遷翰林學士權三司使嘗知福泉杭三州文章清道粹美工書爲 本朝第一殘章繼藁得者珍藏之在泉州之日喪叔母在告其僚章拱之黃垵燕飲用樂君謨怒中以危法後數爲拱之所訴

杜師雄詩一卷

右皇朝杜默字師雄徂徠人石介作三豪篇所謂歌  
之豪者蘇子瞻頗陋之

鄭成之集十卷

右皇朝鄭褒字成之閩人登進士第慕韓愈爲文陳  
詒爲編次其集張景爲之序

徐仲車詩一卷

右皇朝徐積字仲車東莞人

邵堯夫擊壤集二十卷

右皇朝邵雍堯夫隱居洛陽熙寧中與常秩同召力  
辭不起遂於易數始爲學至二十年不施枕而睡其

精如此歌詩蓋其餘事亦頗切理盛行于時卒謚康節集自爲序

張少愚白雲集二十卷

右皇朝張俞字少愚幼通晤於書無不該貫朝廷嘗以校書郎召表乞授其父隱于岷山之白雲谿凡六被召皆不起爲文有西漢風嘗賦洛陽懷古蘇子美見而歎曰優游感諷意不可盡吾不能也

包孝肅奏議十卷

右皇朝包拯字希仁合肥人天聖五年進士權御史中丞知開封府爲人剛嚴聞者憚之雖閭里童稚婦

女亦知其名姓不苟合未嘗偽色辭以悅人平生無私書不受干請雖故人親黨一皆絕之

司馬文正傳家集八十卷

右皇朝司馬光君實也陝州夏縣人初以父蔭入官年二十舉進士甲科故相龐籍薦除館閣校理神宗即位擢翰林學士御史中丞後除樞密副使力辭而去元祐初拜門下侍郎卒年六十謚文正好學如飢之嗜食於學無所不通音樂律曆天文曆數皆極其妙晚節尤好禮其文如金玉穀帛藥石也必有適於用無益之文未嘗一語及之集乃公自編次公薨

子康又沒晁以道得而藏之中更禁錮迨至渡江幸不墜後以授謝克家劉嶠得而刻版上之

王介甫臨川集一百三十卷

右皇朝王安石字介甫撫州臨川人慶曆二年進士累除知制誥神宗在藩邸見其文異之召爲翰林學士熙寧三年拜中書門下平章事熙寧七年罷明年再入相九年罷卒年六十六謚文公其壻蔡卞謂自先王澤竭士習卑陋不知道德性命之理安石奮乎百世之下追堯舜三代通乎晝夜陰陽所不能測而入於神著雜說數萬言其言與孟軻相上下晚以

所學考字畫竒耦橫直深造天地陰陽造化之理著  
字說包括萬象與易相表裏崇寧初卞之兄京秉政  
詔配祀文宣王廟近時議者謂自紹聖以來學術政  
事敗壞殘酷貽禍社稷實出於安石云

呂獻可章奏二十卷

右皇朝呂誨字獻可洛陽人登進士第熙寧初爲御  
史中丞時王安石棄官家居朝野稱其才以爲古今  
少倫 神宗引參大政衆以爲得人獻可獨以爲不  
然居無何安石棄衆任已多變祖宗專汲汲歛民財  
所愛信引拔或非其人天下失望獻可屢爭不能得

乃抗章曰誤天下蒼生必此人 上遣使喻解執之  
愈堅乃出知鄧州温公嘗服其知人誌其墓且序其  
章奏集云其草存者二百八十有九歷觀古人有能  
得其一二者已可載之史籍在獻可蓋不足道也

蒲左丞集十卷

右皇朝蒲宗孟傳正閩州新井人皇祐五年進士曾  
公亮薦除館職 神宗謂宰相曰宗孟有史才乃同  
修國史入爲翰林學士除尚書左丞卒年六十六爲  
人酷暴奢侈蘇子瞻嘗規之云一曰慈二曰儉世以  
爲中其膏肓之疾

趙懿簡集三十卷

右皇朝趙瞻大觀盤屋人少善爲古文慶曆五年登進士第治平中爲侍御史論濮邸事及貶元祐中終於同知樞密院謚懿簡學春秋著書十卷其他文不皆奇也

鮮于諫議集三卷

右皇朝鮮于侁子駿閬中人景祐中登進士乙科

神宗初上書 上愛其文以爲不減王陶元祐中仕

至諫議大夫侁治經術有法論著多出新意晚年爲詩與楚詞尤工人以爲有屈宋風族人之武編次有序



楊元素集四十卷

右皇朝楊繪字元素漢州緜竹人幼警敏讀書一過輒誦至老不忘皇祐初擢進士第二人累擢翰林學士沈存中爲三司使累其所薦王永年事因貶官終於天章閣待制知杭州嘗居無爲山號無爲子爲文競

曾子固元豐類藁五十卷

右皇朝曾鞏字子固南豐人元豐中爲中書舍人卒子固師事歐陽永叔早以文章名天下壯年其文慄鷲奔放雄渾瓌瑋其自負要似劉向藐視韓愈以下也晚年始在掖垣屬新官制方除自填委占紙肆書初

若不經意及屬草授吏所以本法意原職守爲之訓  
勅者人人不同贍裕雅重自成一家歐公門下士多  
爲世顯人議者獨以子固爲得其傳猶學浮屠者  
所謂嫡嗣云

李誠之集三卷

右皇朝李師中字誠之登進士科 仁廟時權廣南  
轉運使終天章閣待制唐子方貶春州誠之嘗有詩  
送行盛傳一時

孫莘老奏議十卷

右皇朝孫覺字莘老元豐末自祕書少監除右諫議

大夫元祐初遷給事中吏部侍郎莘老素與王介甫善後爲諫官論新法遂絕

李公擇廬山奏議十七卷

右皇朝李常字公擇早年讀書於廬山熙寧中爲諫官論青苗法而罷元祐初爲御史中丞

孫賢良進卷十卷

右皇朝孫洙字巨源廣陵人歐陽永叔舉洙賢良上策論五十篇極論時事元豐中直學士院奉詔作靈津廟碑上稱洙學術行誼且大用之累得風緩而卒或云上欲復大理獄洙對合旨由是驟進

錢賢良進卷十卷

右皇朝錢公輔字君倚武進人從胡瑗學昭陵末知制誥

文與可丹淵集四十卷

右皇朝文同與可蜀人進士高第以文學名操韻高  
潔書筆尤妙仕至太常博士集賢校理元豐初出守  
吳興至宛立驛忽留不行一旦沐浴冠帶正坐而逝

呂晉伯軻川集五卷奏議十卷

右皇朝呂大忠字晉伯藍田人汲公之兄皇祐中進  
士除檢討樞密院吏房文字爲河北轉運判官累遷

寶文閣直學士晉伯博極群書爲文尚理致有益於用章奏皆親爲之

呂汲公文錄二十卷文錄掇遺一卷

右皇朝呂大防微仲京兆藍田人皇祐初中進士第哲宗即位召知制誥翰林學士拜尚書左僕射兼門下侍郎紹聖初責授舒州團練副使循州安置未踰嶺卒大防旣拜相常分其俸之半以錄書故所藏甚富其在翰林書命典麗議者謂在元絳之上云

呂和叔誠德集三十卷

右皇朝呂大鈞字和叔嘉祐二年中進士第大防仲

弟也終于宣義郎卹卹延路漕司屬官師張厚之瞻學  
博聞無所不該其文章非義理不發

呂與叔玉溪集二十五卷玉溪別集十卷

右皇朝呂大臨字與叔汲公季弟也登進士第嘗歷  
太學博士秘書省正字從程正叔張厚之學通六經  
尤精於禮解中庸大學等篇行于世嘗賦詩云學如  
元凱方成癖辭類相如始近俳獨倚聖門無一事願  
同回也得心齋正叔可之

晁氏新城集十卷

右皇朝族祖新城府君也公諱某字君成早登進士

第爲杭州新城令以沒蘇子瞻嘗稱其詩清厚靜深而每篇輒出新意奇語

蘇子瞻東坡前集四十卷後集二十卷奏議十五卷內制十卷外制三卷和陶集四卷應詔集十卷

右皇朝蘇軾字子瞻洵之長子也軾生十年其母授以書聞古今成敗輒能語其要比冠學通經史屬文日數千言嘉祐中歐陽永叔考試禮部進士梅聖俞與其事得其論刑賞以示永叔至驚喜以爲異人欲以冠多士疑曾子固所爲乃寘之第二後以書謝永

叔見之語客曰老夫當避此人放出一頭地又以直言薦之答策入上等英宗在藩邸聞其名欲以唐故事召入翰林宰相不可知湖州以表謝上言事者摘其語以謗聞遣官逮赴御史獄初子瞻當王安石紛更法度之際見其事不便於民賦詩以刺焉言者從而媒孽欲寘之死神宗薄其過謫置黃州溫公相哲宗累擢中書舍人除翰林學士承旨紹聖中坐草謫呂惠卿制直書其罪誣以訕謗安置惠州徙昌化元符中北還卒于常州初好賈誼陸贄書論古今治亂不爲空言既謫黃州杜門深居馳騁翰墨一



變平生遇事所爲詩騷銘記書檄論議率皆過人晚  
喜陶淵明詩和之幾徧爲人英辯竒偉於書無所不  
通所作文章才落筆四海已皆傳誦下至閭閻田里  
外至夷狄莫不知其名門下賓客亦皆一世豪傑其  
盛本朝所未有也立朝知無不爲世稱其忠義嘗  
自比范滂孔融議者不以爲過在黃州日自號東坡  
居士世因不呼其名止目之爲東坡云

蘇子由欒城集前集五十卷後集二十四卷

第三集十卷應詔集十二卷

右皇朝蘇轍子由洵之次子也年十九中進士第二

十二舉直言因所問極言得失策入或欲黜之 仁  
宗不許曰以直言召人而以直言 弃天下謂我何  
擢商州推官久之其兄以詩得罪從坐謫監筠州酒  
稅 宣仁臨朝相温公擢中書舍人代子瞻爲翰林  
學士未幾拜尚書左丞紹聖初謫置雷州後北還凡  
居雷循七年居許十六年杜門理舊學於是詩春秋  
傳老子解古史書皆成自謂得聖賢遺意

程伊川集二十卷

右皇朝程頤字正叔珦之子也少與其兄顥從汝南  
周敦實爲學元祐初司馬温公薦于朝自布衣擢崇

政殿說書未幾罷紹聖中嘗謫涪陵專務談經明道  
深斥辭章之學從其游者多知名于世

曾子開曲阜集四十卷奏議十二卷西掖集  
十二卷內制五十卷

右皇朝曾肇字子開子固之弟也登進士第元祐中  
爲中書舍人元符末再入西掖遂爲翰林學士前後  
歷陳穎宋泰海和金陵真定九郡帥守坐兄子宣貶  
亦以散官汀州安置崇寧末移合州居京口而終封  
曲阜侯

黃魯直豫章集三十卷外集十四卷

右皇朝黃庭堅魯直也幼警悟讀五行俱下數過輒  
憶蘇子瞻嘗見其詩於孫莘老家絕嘆以爲世久無  
此作矣因以詩往來會子瞻以詩得罪亦罰金元祐  
中爲校書郎先是秦少游晁無咎張文潛皆以文學  
遊蘇氏之門至是同入館世號四學士而魯直之詩  
尤竒世又謂之蘇黃云紹聖初謫戎州嘗因嘲謔忤  
趙正夫及正夫爲相諭部使者以風指摘所作承天  
院塔記中語以爲幸灾謗國遂除名編隸宜州以崇  
寧四年九月三十日卒

晁無咎鷄肋編七十卷

右皇朝族父吏部公也公諱補之字無咎幼豪邁英爽不群七歲能屬文日誦千言王安石名重天下慎許可一見大奇之在杭州作文曰七述叙杭之山川人物之盛麗時蘇子瞻倅杭州亦欲有所賦見其所作嘆曰吾可以閣筆矣子瞻以文章各一時至屈輩行與之交由此聲名籍甚舉進士禮部別試第一而考官謂其文辭近世未有遂以進御 神宗曰是深於經可革浮薄元祐中除校書郎紹聖初落職監處州酒後知泗州終于官大觀四年也於文章蓋天性讀書不過一再終身不忘自少爲文即能追考左氏

戰國策太史公班固揚雄劉向屈原宋玉韓愈柳宗  
元之作促駕而力鞭之務與之齊而後已其凌厲竒  
卓出於天才非醞釀而成者自韓柳而還蓋不足道也  
秦少遊淮海集三十卷

右皇朝秦觀少游高郵人登進士第元祐初除校勘  
黃本書籍紹聖初除名編隸橫州遇赦北歸至滕州  
卒蘇子瞻嘗謂李廌曰少游之文如美玉無瑕又琢  
磨之巧殆未有出其右者少游亦自言其文銖兩不  
差但華麗爲愧耳

張文潛柯山集一百卷

右皇朝張耒文潛譙郡人仕至起居舍人嘗爲宣潤汝穎充五州守又嘗謫居黃州復州最後居陳以沒元祐中蘇氏兄弟以文倡天下號長公少公其門人號四學士文潛少公之客也諸人多早沒文潛獨後亡故詩文傳於世者尤多其於詩文兼長遷謫雖同時鮮復其比而晚年更喜白樂天詩體多効之云

畢公叔西臺集二十卷

右皇朝畢仲游字公叔蚤登進士第元祐中召天下文學之士三人策試翰林院蘇子瞻以公叔爲第一除集賢校理又表自代云學貫經史才通世務文章

精麗論議有餘自臺郎爲憲漕綽有能聲以黨籍終于西京留臺集陳叔易爲之序

陳無已後山集二十卷

右皇朝陳師道無已彭城人公少以文謁曾南豐一見竒之許其必以文著元祐中侍從合薦于朝起爲太學博士紹聖中以進非科舉而罷建中靖國初入祕書爲正字以卒爲文至多少不中意則焚之存者才十一

臨溪隱居集二十卷

右皇朝魏泰字道輔襄陽人曾布子宣妻之弟也幼



邁爽能屬文嘗從徐禧晚節卜隱漢上人頗言其倚  
子宣之勢爲鄉里患苦云

廖明略竹林集三卷

右皇朝廖正一字明略元祐中召試館職蘇子瞻在  
翰林見其所對策大竒之俄除正字時黃秦晁張皆  
子瞻門下士號四學士子瞻待之厚每來必命侍妾  
朝雲取密雲龍家人以此知之一日子瞻又取密雲  
龍家人謂是四學士窺之乃明略來謝也紹聖間明  
略貶信州玉山監稅鬱不得志喪明而沒自號竹林  
居士

邢敦夫呻吟集一卷

右皇朝邢居實字敦夫和叔之子也敦夫年十四賦  
明妃引蘇子瞻見而稱之由是知名未幾和叔貶隨  
州敦夫侍行病羸嘔血一旦有鈴下老卒驕慢應對  
不遜敦夫怒而擊之無何卒死和叔發怒以敦夫屬  
吏以故疾日侵而夭故黃魯直爲之挽云眼看白壁  
埋黃壤何況人間父子情蓋隱之也集後有子瞻魯  
直無咎諸公跋

貞逢原三蓮集二十卷

右皇朝貞逢原關中人仕至朝議大夫

司馬才仲夏陽集兩卷

右皇朝司馬禎字才仲温公之姪孫元祐初與王當輩同中賢良科調錢塘尉而卒

司馬才叔逸堂集十卷

右皇朝司馬棫字才叔才仲之弟也

張浮休畫墁集一百卷奏議十卷

右皇朝張舜民芸叟邠州人慶曆中范仲淹帥邠見其文異之用温公薦爲諫官仕至吏部侍郎後羈直房陵政和中卒其文豪重有理致而最刻意於詩晚年爲樂府百餘篇自序稱年踰耳順方敢言詩百世

之後必有知音云號浮休先生

陳瑩中了齋集三十卷

右皇朝陳瓘瑩中延平人建中靖國初爲右司諫嘗移書責曾布及言蔡京與弟卞之姦惡章數十上除名編隸合浦以死靖康初贈諫議大夫自號了翁

陳司諫集兩卷

右皇朝陳祐字純益仙井監人登進士第建中靖國初爲臺諫與龔夬任伯雨張公望協力彈擊紹聖姦臣後蔡京用事廢斥而沒

張無盡集三十二卷

右皇朝張商英字天覺登第調官峽路章惇察訪巴蜀風采傾動西南峽中部使者憂之日夕謀所以待之之禮曲盡求辯惇之士以備燕談或以天覺姓名告因檄召至夔州惇既至杯酒間果以人材爲問部使者即言之惇令召入天覺不冠服裁巾長揖徑就坐右惇負氣敢大言天覺吐言壓之惇大喜歸而薦於朝由是召用元祐中爲開封府推官出使河東紹聖初擢御史大觀四年長星見蔡京罷相乃拜右僕射盡反京之政召用元祐遷客天下翕然歸重暮年去位靖康初遂與司馬溫公范文正同日降詔加贈

官爵賜謚文忠疑范文正乃忠宣也

晁氏景迂集十二卷

右從父詹事公也諱說之字以道文元公元孫少慕  
司馬溫公爲人自號景迂去三十蘇子瞻以著述薦  
之元符中上書居邪中等博極群書通六經尤精於  
易傳邵堯夫之學著太極傳措紳高其節行嘗守成  
州時民許歲旱公爲十分盡蠲其稅轉運使大怒督  
責甚峻因丐老而歸靖康初以著作郎召遷祕書免  
試除中書舍人兼太子詹事俄以論不合去建炎初  
終於徽猷閣待制

晁氏崇福集三十五卷四六集十五卷

右從父崇福公也諱詠之字之道以道第也登進士第文中宏詞第一元符末上書居邪等廢斥二十年以朝請郎奉祠崇福宮而終天才英特爲文章立成明潤密緻世以爲宜在北門西掖云

晁氏封丘集二十卷

右世父封丘府君也諱某字伯宇鑠廳中進士第黃魯直嘗薦之於蘇子瞻云晁伯宇謹厚守文元家法從遊多長者其文已能如此年蓋未二十也願子瞻一語教戒之子瞻荅云晁伯宇詩騷細看其奇麗信

乎其家之多異材也雖然凡文至足之餘溢爲竒偉  
今晁君文涉竒似太早可作朋友切磋之語以告之  
非謂其諱也恐傷其邁往之氣耳後坎壈終身卒官  
封丘丞

唐子西集十卷

右皇朝唐庚字子西眉山入登進士第早受知於張  
天覺天覺爲相擢京畿提舉常平且欲用爲諫官天  
覺欲去位言者謂子西嘗宣言有一網打盡之語貶  
惠州大觀五年會赦北歸

韓子蒼集三卷



右皇朝韓駒子蒼仙井人政和初詣闕上書特命以  
官累擢中書舍人權直學士院王甫常命子蒼詠其  
家藏太一真人圖詩成傳一時宣和廷臣獨能詩稱云

劉巨濟前溪集五卷

右皇朝劉涇字巨濟蜀人終于太學博士爲文頗奇恠  
崔德符娑娑女集三十卷

右皇朝崔鷗字德符蚤中進士第元符末上書入邪  
等廢斥幾三十年靖康初召爲右正言居無何感疾  
卒其爲文最長於詩清婉敷腴有唐人風

李元應跨鰲集五十卷

右皇朝李新字元應仙井人早登進士第劉涇嘗薦于蘇子瞻命賦墨竹口占一絕立就坐元符末上書奪官謫置遂州流落終身跨鰲仙井山名也

王履道初寮集十卷內制十八卷外制八卷右皇朝王安中履道真定人政和中有密薦於上者自監大名倉累擢掌內外制後拜太保鎮燕山建炎初貶象州爲文瓌竒高妙最長於制誥李邴入翰林嘗請于上以方今詞林之式首尾舉履道之名自號初寮先生

呂居仁集十卷

右皇朝呂本中字居仁好學問右丞之長子靖康初  
權尚書郎紹興初賜進士第除右史遷中書舍人已  
而落職奉祠少學山谷爲詩嘗作江西宗派圖行于世  
陳參政簡齋集二十卷

右皇朝陳與義去非汝州葉縣人中進士第宣和中  
徽宗見其所賦墨梅詩善之遂登冊府建炎中掌內  
外制拜參知政事以卒晚年詩尤工周葵得其家所  
藏五百餘篇刊行之號簡齋集

胡丞公集十卷資古紹志集十卷

右皇朝胡世將字丞公中進士科早受知於晁無咎

建炎南渡嘗直學士院終於資政殿學士川陝宣撫使爲文敏瞻溫雅掌書命頗有能聲喜聚金石刻効歐公集古錄爲資古紹志集序云以成其先人之志故以紹志目其書

參寥集十二卷

右皇朝僧道潛自號參寥子與蘇子瞻秦少遊爲詩友其言清麗不類浮屠語

洪覺範筠溪集十卷

右皇朝僧惠洪覺範喻氏高安人少孤能緝文張天覺聞其名請住峽州天寧寺以爲今世融肇也未幾

坐累民之及天覺當國復度爲僧易名德洪數延入  
府中及天覺去位制獄窮治其傳達言語於郭天信  
竄南海島上後北歸建炎中卒著書數萬言如林間  
錄僧寶傳冷齋夜話之類皆行于世然多夸誕人莫  
之信云

饒德操集一卷

右皇朝饒節字德操曾布之客也性剛峻晚與布論  
不合因弃去祝髮爲浮屠在襄漢間聲望甚重

李易安集十二卷

右皇朝李氏格非之女先嫁趙誠之有才藻名其舅

正夫相 徽宗朝李氏嘗獻詩曰炙手可熱心可寒  
然無檢操晚節流落江湖間以卒

詹玠將歸集一卷

右未詳何人所題林逋隱居詩當是昭陵時人也

趙韓王集三卷

右皇朝趙普字則平薊州人其父遷洛陽占籍焉乾  
德中代范質爲平章事太平興國六年及端拱初三  
入相薨封真定王謚忠獻卒年七十一普初無學術  
太宗勉之晚年頗該博

范蜀公集十卷

右皇朝范鎮字景仁成都人舉進士爲禮部第一  
仁宗朝知諫院後言王安石新法不便乞致仕歸潁  
昌元祐初詔召不起封蜀郡公年八十一謚忠文

黃真部詩一卷

右皇朝黃觀昭陵時嘗將漕成都

呂吉甫集二十卷

右皇朝呂惠卿字吉甫閩人王安石執政擢參知政  
事初謫知福州紹聖後累領潘鎮有莊子學爲文長  
於表奏

張橫渠崇文集十卷

右皇朝張載字厚之京師人後居鳳翔之橫渠鎮學者稱曰橫渠先生呂晦叔薦之于朝命校書崇文未幾詔按獄浙東既歸卒

馭臣鑒古二十卷

右皇朝鄧綰所著書綰元豐中爲中丞所獻書也未幾坐操心頗僻賦性姦回論事薦人不循分守貶

余氏至言十八篇

右皇朝余安行字仲勉鄱陽人少受知於彭汝礪年八十餘著此書自謂有得於中庸也東南學者多

河間公奏議十卷



右皇朝賈易元祐中爲諫官

汲世論一卷

右未詳何人所著多稱元祐間事且喜論兵疑呂氏書也九十門

陳叔易詩一卷

右皇朝陳恬字叔易

藏寂軒文藁

右皇朝董字襄陽人

趙延持盈要論

右皇朝趙延宣和初任合州石照縣丞日所上

汪彥章集十卷

右皇朝汪藻字彥章嘗爲翰林學士

詩苑類格三卷

右皇朝李淑撰寶元三年豫王出閤淑爲王子傳因纂成此書上之述古賢作詩體格總九十目

韓文辯證八卷

右皇朝洪興祖討論韓愈詩文推考其根源因以訂正其訛繆頗爲該洽云

藝圃折衷六卷

右皇朝鄭厚莆陽人紹興中舉進士第一坐臺評廢

于家

昭德先生郡齋讀書志卷第四下

昭德先生郡齋讀書志卷第四下

總集類

李善注文選六十卷

右梁昭明太子蕭統纂前有序具述其所作之意蓋  
選漢迄梁諸家所著賦詩騷七詔策令教冊秀才之  
表上書啓彈事牋記書移檄難對問議論序頌贊符  
命史論連珠銘箴誅哀策碑誌行狀弔祭文類輯之  
爲三十卷竇常謂統著文選以何遜在世不錄其文  
其人旣往而後其文刻定然則所錄皆前人之作也  
唐李善集注析六十卷善高宗時弘文學士博學經

史百家無不備覽而無文時人謂之書麓初爲輯注  
博引經史釋而忘其義書成上進問其子邕邕無言  
善曰非耶爾當正之於是邕更加以義釋解精於五  
臣今釋事加義者兩存焉蘇子瞻嘗讀善注而嘉之  
故近世復行

五臣注文選三十卷

右唐呂延祚集注延祚以李善止引經史不釋述作  
意義集呂延濟劉良張詵呂珣李周翰五人注延祚  
不與焉復爲三十卷開元六年延祚上之名曰五臣注

唐文粹一百卷

右皇朝姚鉉寶臣編鉉廬州人太平興國初進士文辭敏麗善書札藏書至多頗有異本累遷兩浙漕課吏寫書采唐世文章分門編類初爲五十卷後復增廣之爲薛映荷其事奪官斥連州卒後其子以其書上獻詔藏內府命以一官

古樂府十卷并樂府古題要解兩卷

右唐吳兢纂雜采漢魏以來古樂府詞凡十卷又於傳記洎諸家文集中采樂府所起本義以釋解古題云

玉臺新詠十卷

右陳徐陵纂唐李康成云昔陵在梁世父子俱事東

朝特見優遇時承平好文雅尚宮體故采西漢以來  
詞人所著樂府艷詩以備諷覽

玉臺後集十卷

右唐李康成采梁蕭子範迄唐張赴二百九人所著  
樂府歌詩六百七十首以續陵序編謂名登前集者  
今並不錄唯庾信徐陵仕周陳旣爲異代理不可遺云  
續古今詩苑英華集十卷

右唐僧惠淨撰輯梁武帝大同年中會三教編至唐  
劉孝孫成臯望河之允一百五十四人歌詩五百四  
十八篇孝孫爲之序

珠英學士集五卷

右唐武后朝詔武三思等修三教珠英一千三百卷  
預修書者凡四十七人崔融編集其所賦詩各題爵  
里以官班爲次融爲之序

麗則集五卷

右唐李氏撰不著名集文選以後至唐開元詞人詩  
凡三百二十首分門編類貞元中鄭餘慶爲序

中興間氣集三卷

右唐高仲武輯至德迄大曆中錢起以下二十六人  
詩自爲序以天寶之亂述作中廢至德中興風雅復



振故以名仍品藻衆作著之於前云或又題孟彦深纂

南薰集三卷

右唐竇常撰集韓翃至皎然三十人約三百六十篇  
凡三卷其序云欲勒上中下則近於褒貶題一二三  
則有等衰故以西掖南宮外臺爲目人各系名系贊

本事詩一卷

右唐孟棻撰纂麻茂詞人緣情感事之詩其本事凡  
七類

續本事詩二卷

右僞吳麴常子撰未詳其人自有序云比覽孟初中

本事詩輒搜篋中所有依前題七章類而編之然皆唐人詩也

斷金集一卷

右唐令狐楚輯其與李逢吉酬唱詩什開成初裴夷直序之

漢上題襟集十卷

右唐段成式輯其與溫庭筠余知古酬和詩筆牋題松陵集十卷

右唐皮日休與陸龜蒙酬唱詩九六百五十八首龜蒙編次之日休爲之序松陵者平江地名也

西崑酬唱集二卷

右皇朝楊億劉筠李宗諤晁某錢惟演及當時同館十五人唱和詩凡二百四十七章前有億序

宋唐類詩二十卷

右唐朝僧仁贊序稱羅唐兩士所編而不載其名分類編次唐及本朝祥符已前名人詩

唐百家詩選二十卷

右皇朝宋敏求次道編次道爲三司判嘗取其家所藏唐人一百八家詩選擇其佳者凡一千二百四十六首爲一編王介甫觀之因再有所去取且題云

欲觀唐詩者觀此足矣世遂以爲介甫所纂

寶刻叢章三十卷

右皇朝宋敏求次道編次道聚天下古人詩歌石刻凡一千一百三十篇以其相附近者相從又次以歲月先後王益柔之序云文章難能者莫如詩凡刻之金石者則必其自以爲得或作於人所愛重者故多有新清瓌麗之語覽者其深究焉

歲時雜詠二十卷

右皇朝宋綬編宣獻公昔在中書第三閣手編古詩及魏晉迄唐人歲時章什一千五百有六釐爲十八

卷今溢爲二十卷矣

仕塗必用集二十一卷

右皇朝祝熙載編本朝楊劉以後諸公表啓爲一編  
聖紹堯章集十卷

右皇朝李文友編靖康末至紹興十年赦書詔旨

丹陽類集十卷

右皇朝曾旼編丹陽今潤州春秋曰朱方秦曰丹徒  
孫權改名京口東晉僑立州郡至宋齊陳曰東海獨  
梁曰蘭陵而皆以徐州稱之隋始定今名唐以建康  
諸邑隸焉更爲丹陽郡元豐中改守官于其地因采

諸家之集始自東漢終于南唐凡得歌詩賦贊五百餘篇

雲臺編六卷

右皇朝耿思柔纂華州雲臺觀古今君臣所題詩什清才集十卷

右皇朝劉禹卿編輯古今題劍門詩什銘賦蒲逢爲之序

瑤池新集一卷

右唐蔡省風集唐世能詩婦人李季蘭至程長文二十三人詩什一百十五首各爲小序於其前且總爲

序其略云世叔之婦脩史屬文皇甫之妻抱忠善隸蘇氏雅於回紋蘭英擅於宮掖晉紀道蘊之辯漢尚文姬之辭况今文明之盛乎

九僧詩集一卷

右皇朝僧希畫保暹文兆行肇簡長惟鳳惠業牢昭懷古也陳充爲序凡一百十篇歐公曰進士許洞因會九僧分題出一紙約曰不犯一字其字乃山水風雲竹石花草雪霜星日禽鳥之類於是諸僧皆閣筆此本出李夷中家其詩可稱者甚多惜乎歐公不盡見之許洞之約雖足以困諸僧然論詩者政不當尔

蓋詩多識鳥獸草木之名而楚辭亦寓意於飈風雲霓如池塘生春草窻間列遠岫天際識歸舟雲中辨江樹蟬噪林逾靜鳥鳴山更幽庭草無人隨意綠宮漏出花遲楓落吳江冷空梁落燕泥微雲淡河漢踈雨滴梧桐殘星幾點鴈橫塞長笛一聲人倚樓雞聲茅店月人跡板橋霜之類莫不犯之若使諸公與許洞分題亦須閣筆矧其下者哉

聖宋文粹三十卷

右不題撰人輯慶曆間群公詩文劉牧黃通之徒皆在其選



宋文海一百二十卷

右皇朝江旼編輯 本朝諸公所著賦詩表啓書論  
說述議記序傳文贊頌銘碑制詔疏詞誌挽祭禱文  
凡三十八門雖頗該博而去取無法

皇宋詩選五十七卷

右皇朝曾慥曾公衮孫守顛川帥荆渚日選 本朝  
自寇萊公已次至僧璉二百餘家詩序去博采旁搜  
拔尤取穎悉表而出焉

政和文選二十卷

右政和中或編元豐以後人詩文千餘篇徐禧席旦

其知名者也

西漢文類

右唐柳宗直撰其兄宗元嘗爲之序至  
皇朝其書亡陶氏者重編纂成之

昭德先生郡齋讀書志卷四下